

HIBRU

Pepa ilâ panzi Hibru (Juda)

kalo-tawana tamâta

Tamâta tonje ingere ngua njine ilâ panzi Juda tamâta njinde kalonzi tawana Yesu Kirisi, andeta kinda tasama tamâta njinde na tia. Isama tu kinzi Juda tamâta pinde nenzi kalo-tawana nde kaika tia, kala itu ipu tini kaika panzi. Itu itula panzi tu zo njana sipono muli pa timbunzi nenzi tukuja wa vetanja wa nde marumbu lâ, aku itu kinzi ma sisama tu Yesu Kirisi nde iregege kuku Maro Kindeni tamwata, kala imo Mose wa kinzi anjelo wa kinzi patarawanja tamâta kulunzi. Yesu ne kaika nde njalae njinde, kala kinda ma kalonda tawana i simbo nâ. Ambo kinda takai nâna njana nenda kalo-tawana kê, ande ara njana ma tamandi kaika nâ.

Maro Kindeni Natu itula ngua pa kinda

¹ Munjani lâ, ikura zo rârâ, ande Maro Kindeni io ngua lâ kinzi ngua-tulanja tamâta kawanzi, kala situla i kawa ngua njinde pwataki tava mâsi kie-kie panzi kinda timbunda wukale.

² Andeta lâ zo njine, tâno ne zo laiti njana marumbu kê, ande Maro Kindeni itula i kawa ngua pwataki pa kinda lâ i tamwata Natu kawa. Maro Kindeni ipatea tu Natu njinde ma muli ikai maro pa kelekele ndoni. Aku nia ndoyo Maro Kindeni wurâta ilua Natu njana ipulianzi kelekele ndoni sipanja lâ.

³ I Natu ñinde itula Maro Kindeni kilala pwataki lâ, aku ñinde ipane nia ndoni, itogo sinâla mine. Aku Maro Kindeni tamwata kilala nde ikeno lâ Natu ñinde tini. I kawa ñgua nde kaika ndo, aku ñgua ñinde uru iveta kelekele rârâni simo sondu ku simo nâ. I tamwata iveta nzâla panzi tamâta ñana Maro Kindeni ma izavaru nenzi kiesaka piti ku ive-tanzi sipânga ilonzi mbâra-mbâra. Iveta vetâja ñinde marumbu lâ, ñinenja isañona pa Maro Kindeni Walo Tamwata tini pa wia kâ lâ samba ilo.

Maro Kindeni Natu ña ipânga ñalae, ipole kinzi añelo ñanzi

⁴ Mine kala Maro Kindeni ñoa ilua Natu lâ, aku ñoa ñinde nde ara pâta kanaño, ipole añelo rârâni ñanzi. Aku mine nâ, i io Natu ipânga mbâna-mbâna panzi añelo rârâni, kala simo i kalo.

⁵ Mine nde nanayoni Maro Kindeni ipai Natu mine tu,

“ ‘Noko nde naña natunju. Kala ñine naña amo noko tama”.

Aku i kala iporo ñgua tonje kilo mine tu,

“Naña ma amo i tama, aku i ma imo naña natunju”.

Andeta Maro Kindeni iporo ñgua kaña mine papa añelo tonje, ande tia ndo.

⁶ Aku mine nâ, lâ zo ñana Maro Kindeni io i Natu nzâla-kulu ipânga tamâta lâ tâno kulu, ande ipainzi ne añelo mine tu,

“Miki rârâni ma kapare tukumi kapanea i nâ”.

7 Maro Kindeni iporo ngua kaŋa tonje ŋananzi aŋelo mine tu,

“ ‘Maro Kindeni isupwanzi ne aŋelo sitogo lawea mine silâ sikai kuleŋa papa i. Ivetanzi ne wurâta tamâta sipâŋga sitogo mbamba ne loloa mine.’”

8 Taitu iporo ngua kaŋa tonje pa i Natu mine tu,

“ ‘Maro Ŋalae, noko ma pwai koipu ŋalae, ma kumo mine ku kumo nâ. Noko uru pwai poe sondo ndo panzi ne tamâta.’”

9 Noko tini mwasa pa vetâŋa sondo nâ, aŋga vetâŋa sakamao nde noko ilo papa tia ndo. Mine kala noko tamwata ne Maro Kindeni ipateano tu pwai koipu, aku i ŋoa ŋalae ilano. Koipu tonje ŋa ipole noko ŋa, ande tia ndo. Kinzi sivala samimi kuwae ara ndo lâ noko tini, kala kundeka pâta lâ.”

10 Aku Maro Kindeni kala iporo ngua tonje kilo pa i Natu mine tu,

“ ‘Maro Ŋalae, nia ndoyo noko tamwata kupulia tâno ŋine kala ikeno kaika lâ, aku noko tamwata mbau kupulia samba tava kelekele rârâni simo âta ŋinde tona.’”

11 Samba tava tâno ŋinde ma muli naonzi tia lâ, itogo lalava siŋga ipâŋga râge-râge kala sitambira mine. Aŋga noko nde ma kumo mine ku kumo nâ.

12 Noko ma kuo samba tava tâno pa nia ŋgaŋe, itogo tamâta iviviki ne moe siŋga mine. Noko ma pwai samba ku tâno rua piti, itogo tamâta isawa ne pasawaŋa

‘singa piti lâ tini mine. Taitu noko tamwata uru kupalele, ande tia, aku noko ne mbwera ma marumbu, ande tia.”

¹³ Muṅgani, Maro Kindeni ipai i Natu mine tu, “Noko kusaṅona ṅai pa mbaunṅu wia kâ lee, ikura lâ zo ṅinde naṅa ma aonzi noko ne kazâṅa tamâta simo noko kalo.”

Andeta i iporo ṅgua kaṅa mine papa aṅelo tonṅe tia.

¹⁴ Aṅga kinzi aṅelo nde simo mana, a? Kinzi aṅelo nde koroani nâ, aku uru sikai kuleṅa pa Maro Kindeni. I uru isupwanzi silâ ṅana sivilanzi kalo-tawana tamâta kâ, kinzi ṅinde ipatea lâ tu ma iyautenzi piti lâ kondoma ilo.

2

Maro Kindeni ne vetâṅa ṅana iyaute kindi piti kâ ande vetâṅa ṅalae tina

¹ Mine nde ara ṅana kindi ma taponi muli sondo ndo pa ṅgua mao muṅga taloṅo ṅinde. Tia ma kindi tambariri ṅana toka ṅgua ṅinde muli, itogo wâṅga isakoko ku nao tia lâ.

² Muṅgani, Maro Kindeni io i ne ṅgua tukuṅa lâ kinzi aṅelo kawanzi nâ, ṅana ma siporo situla panzi kindi timbunda wukale. ṅgua tukuṅa ṅinde nde ṅgua mao kanaṅo, aku lâ zo muṅgâṅa ṅinde Maro Kindeni ipare nia pa tamâta ea taṅa kaika kala ipu muli pa tukuṅa ṅinde. I ne pareṅa-nia ṅinde nde sondo ndo.

³⁻⁴ Andeta kaloṅo ṅga; Maro ṅalae Yesu tamwata itula ṅgua pwataki tu i ma iyaute kindi piti lâ kondoma ilo. Aku i kawa ṅgua ṅinde

nde kelekele njalae tina, ipole njua tukuja ndo lâ. I tamwata itula njua njinde panzi tamâta pinde, aku kinzi kala siporo situla pa kinda tu njua njinde nde mao kanao. Andeta njinde nâ tia; Maro Kindeni tamwata kala itula pwataki tu njua njinde nde mao kanao. Mao nâ, iveta mâsi kaika kie-kie, aku iwae Koroani Sapâna ne walo panzi tamâta itogo wisi-ara mine, ikura i tamwata ne pateâna. Aku i ne vetâna njinde itula pwataki tu pâri ara nde mao kanao. Mine kala miki kalomi ngere sonde nga. Mao nâ, mujga Maro Kindeni ipare nia panzi tamâta ea sipu mulinzi pa i ne njua tukuja. Anjga lâ zo njine, ambo kinda ma tapu mulinda pa i ne njua njana ma iyaute kinda piti lâ kondoma ilo, ande kinda ma takura tu takâwa tanjenje njana i ne parejana kâ mâsi mana, a? Kinda ma takura tia ndo.

Yesu nde kinda nenda Yautâna Tamwata

⁵ Kala njine naja ma anjgere njua pinde njana tâno wasaseki njinde Maro Kindeni ma ipulia ipânga lâ zo muli kâ. Kinda tasama tu Maro Kindeni njandai ipatea tu kinzi anjelo ma sikai poe pa tâno njinde nga.

⁶ Andeta mujgani tamâta tonje iporo njua pa Maro Kindeni mine tu,

“Maka tamâta nde sâ kala noko uru ilo njanama.

Maka nde kelekele kaa nâ; mine nde mana mana nga noko uru pwatonama, a?

⁷ Andeta noko mujgani kuo maka kamo kelekele rârâni kulunzi, kala maka kamo noko simbo nâ kalo. Noko kuveta maka kakai koipu, aku kusuka njama kâki lâ.

⁸ Noko kuonzi kelekele rârâni simo maka tamâta kaloma marumbu lâ.”

Ngua ñinde itula pwataki tu kinzi tamâta ma sikai poe pa kelekele ndoni. Maro Kindeni io kelekele rârâni simo tamâta kalonzi. Taitu lâ zo ñine kinda tasama tu tamâta ñandai sikai poe mine pa kelekele rârâni nga.

⁹ Taitu ara ñana kinda ma kalonda ngere ñana Yesu kâ, ina imo kinzi aņelo kalonzi ikura zo mbuku taitu nâ. Maro Kindeni, i wisi-wisi warika, ande ipatea tu Yesu ma ikai kinda tamâta rârâni niânda, ku ma imâte. Mine kala Yesu ikai nâna ñalae tina lee ñinenga imâte lâ. Ñana ñinde kâ Maro Kindeni isuka Yesu kâki, aku io ñoa ñalae lâ i tini marumbu lâ.

¹⁰ Maro Kindeni nde kelekele rârâni warika, aku uru ikea ñana kelekele rârâni kâ. I ilo tu ma ikainzi i natu rârâ silâ simo samba ilo, ñana ma simo ara kâ. Aku ilo pateo tu Yesu ma ikai samba ne nzâla piti panzi tamâta, ku ma ikai nâna ñalae tina ñana iyautenzi tamâta piti lâ kondoma ilo. Aku Yesu ne nâna ñinde isuka i ñana iveta Maro Kindeni ne pateanga ipanga kanaņo.

¹¹ Yesu uru ivetanzi tamâta sipanga ilonzi mbâra-mbâra lâ Maro Kindeni nao. Maro Kindeni nde Yesu tama, aku imo tamâta ñinde tamanzi mine nâ. Mine kala Yesu ñandai mai ñana ipatu tamâta ñinde ñanzi tu “naņa taingutuangu kinzi”.

¹² Yesu ipai Maro Kindeni mine tu,
 “Naņa ma atula ngua pwataki panzi ningunambwe ñana mâsi ñalanala noko munņa kuveta ñinde. Lâ zo ñana kinzi

sipasau tu siwâŋgi pano, ande naŋa ma alâ amo kunzi apaneano mine nâ.”

13 Aku iporo kilo mine tu,

“Naŋa ma apauwo warakâŋgu lâ Maro Kindeni mbau ilo”.

Aku iporo ŋgua tonje kilo mine tu,

“Kamora ŋga, naŋa amo ŋai kunzi tamâta ŋine Maro Kindeni muŋga ipateanzi pana. Kinzi simo i natu wukale.”

Yesu ipâŋga tamâta ŋana ma ivila kinda kâ

14 Yesu iporo ŋgua kie mine ŋananzi Maro Kindeni natu wukale, aku kinzi nde tamâta nâ. Nana duvi ŋinde kâ Yesu tamwata ipâŋga tamâta mao, itogo kinzi mine. Yesu ipâŋga tamâta mao; mine kala lâ i ne zo ŋana imâte kâ, ande iyaula Sadana ndo, inani mateŋa warika.

15 Kinzi tamâta uru siruru ŋana mateŋa kâ, aku ikura zo rârâni simo vianzi lâ tâno kulu, ande ruruŋa ŋinde ipanzi kaika, itogo nimbu mine. Andeta Yesu imâte ŋana ipalalana nimbu ŋinde piti lâ tininzi.

16 Kinda tasama tu ŋgua ŋine nde mao kanaŋo: Yesu imâ ŋana ivilanzi Abraham ne vâsa wukale. I ŋandai imâ ŋana ivilanzi aŋelo ŋga.

17 Mine kala Maro Kindeni ipatea tu Yesu ma ipâŋga itogo tamâta mao mine, ŋana i ma ikura tu iveta patarawâŋa tamâta ŋalae ne wurâta papa Maro Kindeni kâ. I kalo sukâŋa ndo panzi tamâta, aku iveta patarawâŋa tamâta ŋalae ne wurâta rârâni ikura Maro Kindeni ne pateâŋa mine. Mao nâ, Yesu ipâŋga tamâta ŋana i ma

ikura tu ikai nzâla piti panzi tamâta, nana Maro Kindeni ma izavaru nenzi kiesaka piti lâ tininzi.

¹⁸ Munğa, lâ zo ninde Yesu imo tâno kulu, ande samâņa kie-kie imâ ipâņa papa, aku i tamwata ikai nâna nana ipole samâņa ninde kâ. Mine kala lâ zo ndia samâņa kie-kie ma imâ ipâņa panzi tamâta, ande i ikura ndo nana ivilanzi.

3

Yesu na nde nalae, ipole Mose na

¹ Ningunambwe kalo-tawana tamâta wukale, munğani Maro Kindeni ipatea kindi ku isarâwa pa kindi tu talâ papa i. Mine nde ara nana miki ma kalomi ngere sondo nana Yesu kâ. Maro Kindeni isupwa i tu ma itula i kawa ngua pwataki, aku nana ma imo patarawâņa tamâta nalae tona. Kindi uru tatula Yesu parina pwataki mine.

² Nanayoni Mose iveta wurâta sondo pa Maro Kindeni ne ngu, kinzi ninde simo sitogo i ne luma mine. Aku Yesu kala ipono muli sondo pa Maro Kindeni mine nâ, inani munğa ipatea i.

³ Ambo kindi ma tasuka Mose na kâki, ande nîne ara. Taitu ara nana kindi ma tasuka Yesu na kâki ndo, nana tu Yesu na ipole Mose na. Nana tu kindi tasama mine; ambo tamâta tonje ma ipa ne luma kâki, aku luma ninde ipâņa ara, ande tamâta ma sipanea luma ninde nalae koņa tia. Taitu kinzi ma sipanea luma ninde warika nalae tina.

⁴ Mao nâ, tamâta rârâ sisama ñana sipa luma kâ. Andeta Maro Kindeni simbo nâ iveta kelekele ndoni muṅgani lâ.

⁵ Muṅga Mose imo wurâta tamâta panzi Maro Kindeni ne tamâta, kinzi ṅinde simo sitogo i ne luma, aku pa zo ṅinde i uru iveta wurâta ara ndo panzi, ikura Maro Kindeni ne pateâṅa mine. Mose ne wurâta ṅinde nde mine; i uru itula ṅgua pwataki ñana ṅgua ṅinde Maro Kindeni ma iporo lâ zo muli-muli.

⁶ Aṅga Maro Kindeni Natu Kirisi imo iveta wurâta ikura Tama ne pateâṅa mine, kala ika-tonanzi tamâta ṅinde simo sitogo Maro Kindeni ne luma mine. Ambo kinda ma takisi kaika ku tao tininda tava ndekâṅa nâ ñana Maro Ñalae ne zo ñana iveta kinda tamo sondo kâ, ande kinda ma tamo Maro Kindeni ne tamâta, tatogo i ne luma mine.

Kinzi taṅa-kaika tamwatanzi ma sikura tu simo lâ Maro Kindeni ne pwareâṅa nia, ande ma tia

⁷⁻⁸ Kinda tamo Maro Kindeni ne ṅgu. Mine nde ara ñana ma taponu muli sondu pa Koroani Sapâṅa ne ṅgua. Iporo ṅgua panzi Isrel ṅgu mine tu,

“Muṅga, miki timbumi wukale sipu mulinzi pa Maro Kindeni kawa ṅgua, aku simo taṅa-kaika tamwatanzi. Taitu lâ kari ṅine, ambo miki kalonjo Maro Kindeni kawa ṅgua, ande miki ma kapasakana ilomi kalomi kaika katogonzi timbumi mine ndimo. Lâ zo ṅinde, kinzi simo nia bilimu,

⁹ aku simora mâsi nalanjala rârâni naŋa aveta, ikura mbwera tamâta rua (40) lâ. Andeta kinzi simo sikai kazâŋa pa naŋa.

¹⁰ Mine kala naŋa wisinŋu nâna nlae tina panzi tamâta ninde, aku aporo nŋua nnanzi mine tu, 'Kinzi nandai sipono muli sondo pa naŋa nŋa. Ikura zo rârâni, kinzi sipu mulinzi pa nanenŋu nŋua tukuŋa.'

¹¹ Mine kala naŋa wisinŋu nâna, aporo apa nŋua kaika mine tu, 'Mao kanaŋo, kinzi tamâta nŋine ma sikura tu silâ pa nanenŋu pwareâŋa nia tia ku tia ndo!' "

¹² Ninŋu-nambwe wukale, miki kapakatona sondo nŋa. Tia ma nawalami tonŋe ipaveta kuku kiesaka ne vetâŋa, ku ma ipile ne kalo-tawana ku ipu muli pa Maro Kindeni Via Tamwata.

¹³ Miki kaloŋo nŋa; kinda nenda zo marumbu tia yo, ikeno mo nŋai yo. Mine nde ara nana miki taitu-taitu ma kapu tini kaika panzi nawalami kalo-tawana tamâta ikura zo zo. Ambo miki ma kaveta mine, ande kiesaka ne vetâŋa ma ikura tu ilaŋe nawalami tonŋe kala ipu muli pa Maro Kindeni, ande ma tia.

¹⁴ Muŋga, lâ zo ninde nenda kalo-tawana ipânŋa wasaseki, ande nenda kalo-tawana ninde ikeno kaika ndo. Ambo kinda ma kalonda tawana Maro Kindeni kaika mine lee, ikura lâ zo ndia kinda ma tamâte, ande vetâŋa nŋine ma itula pwataki tu kinda tamo tatogo Kirisi ninambwe mine.

¹⁵ Naŋa apaimi kilo tu Koroani Sapâŋa kawa nŋua ikeno mine;

" 'Muŋga, miki timbumi wukale sipu mulinzi

pa Maro Kindeni kawa ngua, aku simo taŋa-kaika tamwatanzi. Taitu lâ kari ŋine, ambo miki kaloŋo Maro Kindeni kawa ngua, ande miki ma kapasakana ilomi kalomi kaika katogonzi timbumi mine ndimo.”

¹⁶ Kinzi tamâta ŋinde siloŋo Maro Kindeni kawa ngua, andeta taŋanzi kaika sikai kazâŋa papa i. Taitu tamâta ŋinde ande ea kinzi, a? Kinzi nde tamâtani ndaina Mose muŋga ikainzi piti lâ Isip tâno!

¹⁷ Maro Kindeni ne wisi-nâna ikeno panzi tamâta ŋinde ikura mbwera tamâta rua (40) lâ. Aku kinzi nde ea, a? Kinzi nde tamâtani ndaina uru siveta kiesaka kala simâte lâ nia bilimu.

¹⁸ Kinzi tamâtani ndaina sipu mulinzi papa Maro Kindeni. Mine kala i ipambwâre tu kinzi warakanzi ma sikura tu silâ pa i ne pwareâŋa nia, ande ma tia.

¹⁹ Mine nde kinda tasama tu tamâta ŋinde nenzi kalo-tawana ikeno pa Maro Kindeni tia, aku ŋana duvi ŋinde kâ sikura ŋana silâ pa i ne pwareâŋa nia, ande tia.

4

Maro Kindeni ne tamâta ma silâ simo pwareâŋa nia

¹ Maro Kindeni muŋga ipa ngua tu ma ikainzi tamâta pinde silâ simo i ne pwareâŋa nia ŋinde. Mine nde ara ŋana kinda ma tapakatona sondu. Tia ma Maro Kindeni imora nawalami tonje tu ikura ŋana ilâ imo pwareâŋa nia ŋinde tia.

² Nia ndoyo Isrel ngu siloŋo pâri ara ŋana pwareâŋa nia ŋinde kâ. Aku lâ zo ŋine kinda kala taloŋo pâri ara ndainani nâ tona. Taitu kinzi Isrel ngu siloŋo nâ, aŋga kalonzi tawana Maro Kindeni nde tia. Mine kala pâri ara ŋinde ivilanzi tia.

³ Andeta nenda kalo-tawana nde ikeno pa Maro Kindeni. Mine nde kinda ma talâ tamo pwareâŋa nia ŋinde, ikura Maro Kindeni ne ŋgua pâŋa mine. I muŋga iporo ipambwâre tu, “ ‘Mine kala naŋa wiŋgu nâna, aporo apa ŋgua kaika mine tu, ‘Mao kanaŋo, kinzi tamâta ŋine ma sikura tu silâ pa nanenŋu pwareâŋa nia tia ku tia ndo!’ ”

Andeta nia ndoyo, lâ zo ŋinde Maro Kindeni ipulia tâno ipâŋga wasaseki, ande iveta pwareâŋa nia ŋinde muŋgani lâ ikeno.

⁴ Maro Kindeni kawa ŋgua tonŋe ŋana pwareâŋa kâ ikeno lâ pepa tini mine tu, “Ŋinenŋa zo tonŋe ipâŋga, i ŋa tu ‘Kari lima kanaŋo rua’. Aku Maro Kindeni iveta wurâta tonŋe kilo lâ zo ŋinde, ande tia.”

⁵ Aku kalomi ŋgere kilo ŋana Maro Kindeni kawa ŋgua ŋana pwareâŋa kâ i muŋga iporo mine tu, “Kinzi tamâta ŋine ma sikura tu silâ pa nanenŋu pwareâŋa nia tia ku tia ndo!”

⁶ Ŋgua ŋinde itula pwataki tu Maro Kindeni ne pwareâŋa nia nde ikeno mo ŋai yo, aku ipateanzi tamâta pinde tu ma simo nia ŋinde. Aŋga tamâta pinde sikura ŋana simo nia ŋinde tia, ŋana tu kinzi muŋga siloŋo pâri ara ŋana pwareâŋa nia ŋinde kâ, andeta sipu mulinzi pa Maro Kindeni.

⁷ Kinzi Isrel ngu taŋanzi kaika mine pa Maro Kindeni, aku simo lee mbwera rârâ ilâ lâ. Nininga Maro Kindeni itula ngua pwataki lâ timbunda Daviti kawa mine tu,

“Taitu lâ kari ŋine, ambo miki kaloŋo Maro Kindeni kawa ngua, ande miki ma kapasakana ilomi kalomi kaika ndimo.”

Nana muŋga nâ atula nguani ndaina pwataki pami kaloŋo lâ. Lâ Daviti ne zo ŋinde, Maro Kindeni ipatu zo tonje ŋa tu “Kari ŋine”. Aku ŋinde itula pwataki pa kindu tu ipatea zo tonje kilo panzi tamâta, ŋana ma silâ simo i ne pwareŋa nia.

⁸ Muŋga, lâ zo ŋinde Isrel ngu simo nia bilimu, ande timbunda Yosua ikura ŋana ionzi simo pwareŋa nia mao, ande tia. Mine kala muli Maro Kindeni iporo ŋana zo tonje kilo.

⁹ Mine kala kindu tasama tu Maro Kindeni ne tamâta nenzi pwareŋa nia nde keno mo ŋai yo, aku pwareŋa ŋinde itogo zo sapâŋa ŋana taveta wurâta tonje tia,

¹⁰ ŋana tu tamâta ea imo Maro Kindeni ne pwareŋa nia, ande i iveta ne wurâta marumbu lâ, kala ma ipwarea nâ, itogo nia ndoyo Maro Kindeni tamwata iveta ne wurâta rârâni lâ, nininga iveta wurâta tonje kilo tia.

¹¹ Mine nde ara ŋana kindu ma takai wurâta kaika ŋana talâ tamo pwareŋa nia ŋinde. Tia ma tamâta tonje lâ ŋgininda ipu muli pa Maro Kindeni, itogo Isrel ngu muŋga siveta mine. Ambo tamâta tonje ma iveta mine, ande i ma pata ndue ku ma ilâ imo pwareŋa nia ŋinde, ande tia.

¹² Nana tu Maro Kindeni kawa ngua nde imo via, aku ngua ninde ne walo ikeno tava. I kawa ngua ninde nde itogo pila mata ruru ndo, ipole pila kazâna kâ ne mata. Kawa ngua ninde uru isowe tamâta ilonzi kalonzi pwapwataki, aku ilâ lee ipânga lâ nia ninde tamâta ilo wa koroani wa sipasenje lâ simo. Aku kawa ngua ninde ilâ lee ipânga lâ nia ninde tuka ipasenje lâ taitu kuku noŋo ikeno tuka ilo ninde. Maro Kindeni kawa ngua uru ikai samâna pa tamâta nenzi ilo-kalo ndoni, aku itula pwataki ipânga nia yo.

¹³ Kelekele tonje ikura nana ikeno paveâna lâ Maro Kindeni nao, ande tia ndo. Kelekele rârâni ipatula pwataki ikeno nia yo lâ i nao. Aku vetâna ndia kinda taveta, ande kinda ma muli tapatula ninde rârâni pa Maro Kindeni tamwata mine nâ.

Yesu kalo sukâna nana kinda kâ

¹⁴ Kinda nenda patarawâna tamâta nalaie imo. Ina Yesu, Maro Kindeni Natu, aku imo samba ilo kuku Maro Kindeni. Mine nde ara nana nenda kalo-tawana ma ikeno kaika ndo, itogo uru taporo tatula pwataki mine.

¹⁵ Nana tu nenda patarawâna tamâta ninde isama tu kinda warakânda nenda kaika nana tapole kiesaka kâ ikeno pa kinda tia, ande kala i kalo sukâna ndo nana kinda kâ. Aku samâna kie-kie ipânga pa i, ikura samâna rârâni uru ipânga pa kinda mine. Andeta i tamwata ipole samâna ninde rârâni, aku iveta kiesaka tonje tia ndo.

¹⁶ Mine nde ara nana kinda ma tamandi kaika ku toka talâ Maro Kindeni tini laiti, ina wisi-wisi

warika. Ambo kinda ma taveta mine, ande kinda tasama tu i ma kalo sukâŋa ŋana kinda kâ, aku lâ zo ndia malia pinde ma ipâŋga pa kinda, ande i ne wisi-wisi ŋinde ma ivila kinda lâ zoni ndaina.

5

Yesu ina kinda nenda patarawâŋa tamâta ŋalae

¹ Nzâla taitu nâ ikeno ŋana tamâta tonje ma imo tamâta ŋalae panzi patarawâŋa tamâta rârâni. Maro Kindeni ipateanzi tamâta ŋinde tu ma sikai tamâta ndamwanzi ku siveta wurâta papa i. Patarawâŋa tamâta nenzi tamâta ŋalae ne wurâta tonje nde ŋana io wisi-ara ne kelekele ilâ pa Maro Kindeni; aku wurâta tonje kilo nde ŋana iveta patarawâŋa kie-kie, ŋana Maro Kindeni ma izavaru tamâta nenzi kiesaka piti kâ.

² Andeta kinzi patarawâŋa tamâta nenzi tamâta ŋalae nde tamâta nâ, kala i ne kaika ŋana iveta vetâŋa ara kâ nde ŋalae koŋa tia. Ŋana ŋinde kâ, i ikura tu iporo ŋgua mwasa nâ pa tamâta ea izizâla ŋana Maro Kindeni nzalani kala iveta vetâŋa potomule.

³ Mine kala patarawâŋa tamâta nenzi tamâta ŋalae ne wurâta nde ŋana iveta patarawâŋa pa Maro Kindeni, ŋana izavaru i tamwata ne kiesaka ŋga tamâta nenzi kiesaka piti.

⁴ Tamâta ea ipâŋga tamâta ŋalae panzi patarawâŋa tamâta, ande tamâta ŋinde ŋa ipâŋga ŋalae. Taitu tamâta tonje ikura tu ipatea tamwata ŋana iveta wurâta ara ŋinde kâ, ande tia. Maro Kindeni simbo nâ ikura tu ipatea

tamâta tonje nana ikai wurâta ninde kâ, itogo nia ndoyo ipatea Mose tai Aron mine.

⁵ Mine nde Kirisi kala nandai ipasuka tamwata tini, ninennga ikai wurâta ara nana ikai poe panzi patarawânga tamâta rârâni nga. Maro Kindeni tamwata ipatea i nana ikai wurâta ninde kâ. Maro Kindeni iporo ngua pa Kirisi mine tu,

“ ‘Noko nde naŋa natuŋgu. Kala nîne naŋa amo noko tama.”

⁶ Aku Maro Kindeni iporo ngua tonje kilo papa Kirisi mine tu,

“ ‘Noko ma kumo patarawânga tamâta mine ku kumo nâ. Noko kumo patarawânga tamâta ŋalae, kutogo Melikisede mine.”

⁷ Muŋga, lâ zo ninde Yesu imo tâno kulu, ande i uru ikai noŋa kaika pa Maro Kindeni. Isama tu Maro Kindeni ikura nana ipono nzâla nanzani tamâta ninde situ sipu i pâta imâte. Mine kala lâ zo nana ikai noŋa pa Maro Kindeni, ande i uru isarâwa kaika, aku i mata sulu indue tona. Yesu ipatawa tamwata tini, aku iyoka Maro Kindeni kawa ngua muli nâ. Mine kala Maro Kindeni ipaloŋo papa i ne noŋa ninde.

⁸ Mao nâ, Yesu nde Maro Kindeni Natu. Andeta pa zo ninde i uru ikai nâna, aku nâna ninde ipanana i sondo ndo nana ipaveta kuku Maro Kindeni kawa ngua.

⁹⁻¹⁰ Nana ninde kâ, ande Yesu ipânnga tamâta sondo ndo nana imo tamâta ŋalae panzi patarawânga tamâta. Mine nde Maro Kindeni ipatea i lâ, aku ipai tu, “Noko ma kumo patarawânga tamâta ŋalae, kutogo Melikisede mine.” Aku Yesu ipânnga Yautânga Tamwata tona,

ņana i ma via mao ilanzi tamâta ea sipaveta kuku i kawa ņgua nâ, ņana ma simo vianzi mine ku simo nâ.

Kinda ma tamo tatogonzi lâlu puro-puro mine ndimo

¹¹ ņgua rârâ keno mo ņai yo ņana Yesu ne wurâta ņinde kâ, aku maka iloma tu katula ņgua ņinde pwataki pami. Andeta miki ilomi kalomi nde pasâsâe lâ, aku ipwa ņalae koņa tia. Mine nde maka ma katula ņgua ņinde duvi pwataki pami mâsi mana, a?

¹² Mao nâ, miki kapâņga kalo-tawana tamâta muņgani lâ, aku zo rârâ ilâ lâ, ikura ņana miki ma kapanananzi tamâta pinde ņana Maro Kindeni kawa ņgua kâ. Andeta tia. Miki uru wurâta ņalae kalanzi tamâta pinde ņana sipananami kilo ņana Maro Kindeni kawa ņgua kâ, ņgua ņinde kala nia ndoyo ipâņga nia yo pami lâ. Miki katogonzi lâlu puro-puro mine. Mine kala miki ņandai kakura ņana kaka kâpwa kaika ņga. Miki uru kanu suu nâ.

¹³ Kinda tasama tu ambo tamâta tonje inu suu nâ, ande i nde lâlu puro-puro nâ, aku izizâla ndo ņana ņgua ņana vetâņa ara kâ. Mine kala ikura ņana isama vetâņa ara kilala pwataki, ande tia.

¹⁴ Aņga kaniņa kaika nde tamâta kanzi, aku kinzi ņinde uru sipanâna sondo ndo ņana sisama vetâņa ara kilala wa vetâņa sakamao kilala wa, kala ilonzi kalonzi nde ipâņga sondo ndo.

6

Ara ɲana kinda ma tamandi kaika ku tao tininda ɲana zo ɲinde Maro Kindeni ma iveta nenda kalo-tawana ipâŋga sondo

¹ Kinda taloŋo wa tasama pâri ara ɲana Kirisi kâ marumbu lâ. Mine nde ara ɲana ma tapanâna ɲana Maro Kindeni ne ilo-kalo wasaseki pinde. Maka muŋga kapananami ilo-kalo pinde, aku ilo-kalo ɲinde itogo kalo-tawana ne duvi. Maka kapananami lâ ɲana kapalele ilomi kalomi ku kalomi tawana Maro Kindeni, aku kapananami ɲana kapile vetâŋa soki-soki tona, vetâŋa ɲinde kala io miki lâ nzâla ɲinde ilâ pa mateŋa kâ.

² Maka kapananami ɲana lââ-liliŋa ne mâsi kie-kie kâ, aku kapananami ɲana kao mbaumi kâki lâ tamâta kulunzi ku kano pa Maro Kindeni ɲananzi tona. Maka kapananami lâ ɲananzi mateŋa tamâta ma muli simo vianzi kilo, aku kapananami ɲana zo ɲinde Maro Kindeni ne pareŋa-nia ma ilâ panzi tamâta rârâni ikura zo zo tona.

³ Ambo Maro Kindeni ma isâu pa kinda tu ma tapanâna ɲana ilo-kalo wasaseki pinde, ande ara ɲana ma tapanâna ɲana.

⁴⁻⁶ Tamâta pinde muŋga siloŋo Maro Kindeni kawa ɲgua, aku sisama tu ɲgua ɲinde nde mao kanaŋo. Maro Kindeni ne wisi-wisi ilâ panzi lâ. Kinzi sikai Koroani Sapâŋa lâ, aku ilonzi patea tu Maro Kindeni kawa ɲgua nde ara ndo. Kinzi simora wa sisama Maro Kindeni ne walo ɲalae, waloni ɲinde ma muli ipâŋga nia yo. Kinzi simora wa sisama kelekele ɲinde rârâni

marumbu lâ, andeta sipu mulinzi papa Maro Kindeni. Mine kala nzâla tonje keno panzi tamâta mine nana ma sipalele ilonzi kalonzi sitaulo silâ pa Yesu kilo, ande tia ndo. Ninde itogo kinzi warakanzi sipu Maro Kindeni Natu lâ kâi popole tini kilo, aku itogo kinzi siveta nzâla panzi tamâta pinde nana siporo ngua pavaligiņa papa i lâ ngu naonzi kilo. Mine kala sipayaula warakanzi ndo lâ.

⁷ Ikura zo rârâ karâzi imbe indue tâno pinde kulu. Karâzi ninde isuka tâno ninde, kala kâpwa ara ipânġa lâ tâno ilo ku isuka tâno ninde warika tavanzi i kaiwa-natu. Kinda tasama tu Maro Kindeni iveta kie ara pa tâno ninde.

⁸ Andeta wâlo mata-mata tava unza sakamao ipânġa lâ tâno pinde, aku kinda tasama tu tâno ninde nde ara tia. Zo laiti nana Maro Kindeni ma itu ngua nana iyaula tâno ninde, aku muli nġa yââ ma kana marumbu lâ.

⁹ Niņġu-nambwe wukale, kala nġine maka kaporo ngua kaika mine pami. Andeta maka kasama tu zavaruņa mine ma ipânġa pa miki tia. Maro Kindeni iyautemi piti lâ kiesaka ne wâlo kaika, aku ma iveta kie ara pami.

¹⁰ Maro Kindeni uru ipare nia sondo panzi tamâta nana nenzi vetâņa kâ. Miki nemi kalotawana nde ipaņo ilomi kalomi marumbu lâ, kala miki kamo kaveta vetâņa kie-kie nana kasukanzi nimi-nambwe kalo-tawana tamâta kâ. Miki nemi vetâņa mine itula pwataki tu miki ilomi ndo ikeno pa Maro Kindeni, aku i ma kalo kapa nana nemi vetâņa ninde kâ, ande tia.

¹¹ Maka iloma ndo tu miki rârâni taitu-taitu

ma kamandi kaika nana kaveta vetâna ara mine lee, ikura lâ zo ndia miki ma kapânga lâ keru. Ambo miki ma kaveta mine, ande Maro Kindeni ma iveta kie ara pami, ikura miki uru kao tinimi nana i tu ma iveta mine.

¹² Maka tinima pwâka tu miki ma kakai wulitia. Maka iloma tu miki ma kapaveta sondu kuku vetâna ndia kinzi kalo-tawana tamâta mao uru siveta. Kinzi tamâta ninde kalonzi tawana Maro Kindeni ku simo sio tininzi nana i kâ, aku uru sikai kelekele rârâni i muŋgani iporo tu ma ilanzi i natu wukale.

Maro Kindeni ne nua pâna nde mao kanao

¹³ Singani Maro Kindeni iveta nua pâna kuku Abraham. Lâ zo ninde, iveta mâsi tonje nana itula pwataki tu i ne nua pâna ninde nde mao kanao. Tamâta tonje ne walo ipole Maro Kindeni ne walo, ande tia ndo. Mine kala i ilo pateka tu ma io i tamwata na ipasipa kuku nua pâna ninde.

¹⁴ Lâ zo ninde, Maro Kindeni ipatu i tamwata na ku ipa nua kuku Abraham mine tu, “Nana aporo mao kanao; nana ma aveta kenju ara nâ pa noko, aku ma avetanzi noko ne vâsa sipânga kambwanenzi walo.”

¹⁵ Abraham kalo tawana nua ninde lâ, kala io tini nana nua pâna ninde tu ma ipânga kanao. Io tini lee aku muli, ninenga vetâna ninde rârâni ipânga papa i, ikura Maro Kindeni ne nua pâna mine.

¹⁶ Aku kinda tamâta nenda mâsi nana taveta nua pâna kâ, ande mine nâ. Ambo tamâta

tonge itu iveta ne ngua pânja ipânja kaika, ande i ma kalo ngere nana tamâta njalae tonge, i ne walo ipole tamâta njinde ne walo, njinnga ma io tamâta njalae njinde na ipasipa kuku i ne ngua pânja. Aku i ne mâsi mine isae nzâla nana tamâta njinde nenzi ngua kâ, kala kinzi ma sikura tu sitawa i ne ngua pânja njinde ndue, ande tia.

¹⁷ Maro Kindeni ipa ngua njinde nananzi Abraham ne vâsa kâ, aku i ilo tu kinzi ma sisama i kilala pwataki tu i nana ipalele tamwata ilo kalo nana ne ngua pânja kâ, ande tia. Mine kala io tamwata na ipasipa kuku ngua pânja njinde, nana iveta ngua pânja njinde ipânja kanao.

¹⁸ Kinda tasama tu Maro Kindeni ne ngua pânja ikura tu ipalele kilo tia. Aku mine nâ, i ne mâsi nana iveta ngua njinde ipânja kanao kâ kala ikura nana ipalele tia. Aku Maro Kindeni ikura tu iporo ngua lanja tonge nana kelekele rua njinde kâ, ande tia ndo. Kinda takâwa talâ papa i tu ma ikea nana kinda kâ. Ambo kinda ma kalonda ngere nana i ne ngua pânja tava ne mâsi nana iveta ngua njinde ipânja kanao kâ, ande njinde ma ipu tini kaika pa kinda, aku ma tamo tao tininda nana i tu ma iveta kie ara pa kinda, ikura ne ngua pânja mine.

¹⁹ Kinda uru tao tininda nana Yesu tu ma iveta kinda tamo ara mine ku tamo nâ, aku nenda kalo-tawana njinde iveta ilonda kalonda ikeno sondo, itogo wânja ne mira malia iveta wânja ipâti sondo lâ tâi kulu mine. Njinde itogo nenda kalo-tawana ikai lalava njalae piti lâ samba ne luma sapânja nzâla kawa. Mine kala

kinda takura tu talâ luma sapâña ne ilo kisiña pwataki sapâña ndo ñinde ilo.

²⁰ Nanayoni, Yesuni tamwata imunğa pa kinda ku ilâ luma kisiña pwataki ñinde ilo ñana ivila kinda kâ. I ipânğa tamâta ñalae panzi patarawâña tamâta rârâni marumbu lâ, itogo Melikisede mine, aku ma imo mine ku imo nâ.

7

Melikisede i ña ñalae ndo

¹ Melikisede ina munğa imo koipu ñalae lâ Salem lawea, ande imo Maro Kindeni âta Tamwata ne patarawâña tamâta tona. Singani, timbunda Abraham ikainzi ne ñgu silâ paraña ilo, aku sipunzi koipu ñalanala ñapa nenzi ñgu marumbu lâ. Nñenğa Abraham itaulo ilâ pa ne lawea kilo, andeta Melikisede ipakâtu kuku lâ nzâla, aku ipai Abraham tu “Maro Kindeni itu nzâmbe pano.”

² Munğa Abraham ikai mbaliña kie-kie lâ paraña ñinde ilo. Mine kala iwae kelekele ñinde ipânğa itogo ñgu sañao, ñnenğa ñgu taitu nde ikai piti ilua Melikisede. Kinda talele ñoa ñinde “Melikisede” mine tu, “Koipu Ñalae ina uru iveta vetâña sondo”. Aku Melikisede nde imo Salem lawea nenzi koipu ñalae tona, aku ñoa ñinde nde duvi mine; “Koipu Ñalae ina uru ivetanzi tamâta simo tava wisinzi pisi nâ”.

³ Nğua tonje ikeno lâ pepa tini ñananzi Melikisede tina-tama wa timbu wukale wa, ande tia. Aku mine nâ, ñgua tonje ikeno ñana ne zo tina ipagugua i wa ne zo ñana imâte kâ wa, ande

tia. I nde imo itogo Maro Kindeni Natu mine, nana tu i imo patarawâna tamâta ikura zo rârâni ku imo nâ.

⁴ Ambo miki ma kalomi ngere sondo nana Melikisede kâ, ande ma kasama tu i na nalaе ndo. Kinda timbunda Abraham, ande imo tamâta nalaе. Andeta Abraham ikai kelekele arara rârâni munnga ikai lâ paraņa ilo, aku iwae mbaliņa ninde lâ ngu saņao, ninennga ngu taitu ilua Melikisede.

⁵ Kinzi Livai ne vâsa ngu uru siveta patarawâna tamâta ne wurâta. Aku Mose ne tukunja ikeno mine tu, “Miki Isrel tamâta rârâni ma kawae nemi mbaliņa pwapwataki lâ ngu saņao, aku ngu taitu ma kalanzi patarawâna tamâta lâ Livai ne vâsa ngu, itogo nemi patarawâna mine.” Mao nâ, kinzi Isrel tamâta nde simo Livai ne vâsa ngu nawalanzi, aku kinzini nde Abraham ne vâsa tona. Andeta kinzi uru mbaliņa silanzi Livai ne vâsa ngu.

⁶ Miki kalomi ngere sondo nga; Melikisede nandai ipânnga lâ Livai ne vâsa ngu. Taitu ikai kelekele pinde piti lâ Abraham ne mbaliņa ninde, aku ipai Abraham tu, “Maro Kindeni itu nzâmbe pano.” Aku Abraham nde tamâtani ndaina Maro Kindeni munnga iveta ne ngua pânja kuku.

⁷ Kinda tasama tu ambo tamâta tonje ma iporo ngua kaņa mine pa tamâta tonje, ande i nde tamâta nalaе, aku i na ipole tamâta ninde na.

⁸ Kinzi patarawâna tamâta lâ Livai ne vâsa ngu uru sikai patarawâna ne mbaliņa saņenzi

Isrel ngu. Andeta kinzi rârâni nde tamâta nâ, kala ma muli simâte. Anğa Melikisede, ina tamâta nînde ikai mbaliņa sanje Abraham, ande Maro Kindeni kawa ngua tonje ikeno nana i ne mateņa kâ, ande tia.

⁹⁻¹⁰ Lâ zo nînde Abraham ipakâtu kuku Melikisede lâ nzâla, nînenğa mbaliņa pinde ilua i, ande Abraham timbu Livai nandai ipânğa imo via lâ tâno kulu nğa. Taitu kinda ma tasia ngua tu lâ zo nînde, Livai imo Abraham ilo. Mine kala nînde itogo Livai tamwata io ne patarawâņa lâ Abraham mbau ilo, nana Abraham ma ilua Melikisede. Andeta Livai ne vâsa ngu nde tamâta nana sikai patarawâņa ne mbaliņa sanjenzi Isrel ngu.

Yesu ina patarawâņa tamâta wasaseki, aku i na ipole kinzi patarawâņa tamâta munğâņa rârâni nanzi

¹¹ Sinğani, kinzi Isrel ngu sikai ngua tukuņa, aku tukuņa nînde itula pwataki tu kinzi tamâta lâ Livai ne vâsa ngu ma simo Isrel nenzi patarawâņa tamâta. Ayo, miki kalonjo nğa. Kinzi patarawâņa tamâta lâ Livai ne vâsa ngu nenzi wurâta ikura tu ivetanzi tamâta sipânğa ilonzi mbâra-mbâra lâ Maro Kindeni nao, ande tia. Mine kala Maro Kindeni iporo tu patarawâņa tamâta wasaseki tonje ma muli imâ ipânğa, aku patarawâņa tamâta wasaseki nînde nandai ipânğa lâ Livai ne vâsa lâ Aron ne ngu; i imo itogo Melikisede mine.

¹² Kinda tasama tu ambo patarawâña tamâta nenzi wurâta ma ipalele mine, ande ñinde itula pwataki tu ñgua tukuña kala ipalele mine nâ.

¹³ Maro Kindeni iporo ñgua ñinde ñana patarawâña tamâta wasaseki, ande iporo ñana nenda Maro Ñalae nâ. Aku Maro Ñalae ñandai ipânga lâ Livai ne vâsa ñgu. Ipânga lâ ñgu tonje, aku tamâta tonje lâ ñgu ñinde munja iveta patarawâña tamâta ne wurâta, ande tia ndo.

¹⁴ Kinda tasama tu nenda Maro Ñalae ipânga lâ Juda ne vâsa ñgu. Andeta Mose ñandai iporo tu ñgu ñinde nenzi tamâta tonje ma imo patarawâña tamâta nga.

¹⁵ Ayo, mine kala nema ñgua ñine duvi ipânga nia yo lâ. Patarawâña tamâta wasaseki ñinde ipânga lâ, aku i imo itogo Melikisede mine.

¹⁶ Ñgua tukuña iporo tu kinzi tamâta lâ Livai ne vâsa ñgu ma siveta patarawâña tamâta ne wurâta, aku ñana ñgua tukuña ñinde kê kinzi uru siveta wurâta ndaina. Aña Maro Ñalae nde ikai wurâta ñinde lâ nzâla tonje. I ne via ma marumbu tia ndo, aku ne via kaika ñinde iveta i ipânga patarawâña tamâta.

¹⁷ Ñana tu Maro Kindeni kawa ñgua ikeno lâ pepa tini mine tu,

“ ‘Noko ma kumo patarawâña tamâta mine ku kumo nâ. Noko kumo patarawâña tamâta ñalae, kutogo Melikisede mine”.

¹⁸ Mine nde kinda tasama tu Maro Kindeni izavaru ñgua tukuña munjâña ñinde piti lâ, ñana tu ñgua tukuña ñinde ne kaika ikeno ñana ivilanzi tamâta kê, ande tia.

19 Mose ne tukuŋa ŋinde ikura tu iveta tamâta tonje ipâŋga ilo mbâra-mbâra lâ Maro Kindeni nao, ande tia. Mine kala Maro Kindeni itula nzâla ara tonje pa kinda, aku nzâla ŋinde ipole ŋgua tukuŋa muŋgâŋa ŋinde ndo lâ. Aku ŋana nzâla ŋinde kê, ande kinda takura tu talâ tamo Maro Kindeni tini laiti.

20 Andeta ŋinde nâ tia; nanayoni Maro Kindeni ipatea Yesu tu ma ipâŋga patarawâŋa tamâta, aku lâ zo ŋinde io tamwata ŋa ipasipa kuku ne ŋgua pâŋa ŋinde. Taitu lâ zo ŋana tamâta pinde sipâŋga patarawâŋa tamâta, ande mâsi mine ipâŋga tia ndo.

21 Mao nâ, Maro Kindeni ipatu i tamwata ŋa, ŋinenŋa iveta Yesu ipâŋga patarawâŋa tamâta. Maro Kindeni kawa ŋgua ikeno lâ pepa tini mine tu,

“Naja Maro Njalae aporo mao kanaŋo tu noko ma kumo patarawâŋa tamâta mine ku kumo nâ. Aku nanenŋu pateâŋa ŋine ma muli ipalele kilo, ande tia ndo.”

22 Mine nde kinda tasama tu Yesu tamwata nde tamâta ŋana iveta ŋgua pâŋa ŋinde ipâŋga kanaŋo kê, aku ŋgua pâŋa ŋinde nde ara ndo, ipole ŋgua pâŋa muŋgâŋa.

23 Tamâta kambwanenŋi rârâ sipâŋga simo patarawâŋa tamâta, ŋana tu kinzi rârâni taitu-taitu uru siveta wurâta lee simâte, ŋinenŋa tamâta wasaseki pinde sikai nianzi.

24 Anŋa Yesu nde imo via mine ku imo nâ. Mine kala tamâta tonje ma ikai i nia ŋana iveta patarawâŋa tamâta ne wurâta kê, ande ma tia.

²⁵ Mine nde lâ zo ñine wa zo muli-muli wa, ande i ikura ndo ñana iyautenzi tamâta piti lâ kondoma ilo, kinzi ñinde kalonzi tawana i kala simâ pa Maro Kindeni. Ñana tu i uru ikai noña papa Maro Kindeni tu ma ivilanzi tamâta ñinde. Mao nâ, i uru iveta mine ku imo nâ.

²⁶ Yesu inani patarawâña tamâta nenzi tamâta ñalae, aku ikura ndo ñana ivila kinda kê, ñana tu Maro Kindeni ilo ara ndo ñana i kê, aku i ne soki tonje ikeno tia ndo. I imo mbâra-mbâra ndo lâ Maro Kindeni nao. Maro Kindeni isuka i kêki kala imo âta ñinde pa samba lawea, aku imo piti ndo ñananzi kiesaka tamwatanzi.

²⁷ I ne wurâta ñandai iregege kuku patarawâña tamâta pinde nenzi tamâta ñalajala ñinde nenzi wurâta nga. Ikura zo zo kinzi uru siveta patarawâña tonje muña ñana izavaru warakanzi nenzi kiesaka piti kê, aku muli, ñinenğa siveta patarawâña tonje kilo ñana izavaru kinzi tamâta nenzi kiesaka piti. Anğa Yesu nde iveta mine tia. Iveta patarawâña mbwani taitu nâ lâ zo taitu mai nâ, lâ zo ñinde ipatarâwa tamwata pa Maro Kindeni.

²⁸ Mose ne ngua tukuña itula nzâla ñana tamâta tonje ma ipânğa imo tamâta ñalae panzi patarawâña tamâta rârâni, andeta tamâta ñinde nenzi kaika ñana siveta wurâta ñinde kê, ande tia. Andeta Maro Kindeni ne ngua pânğa ipânğa muli, aku ipatu tamwata ña ñinenğa ipa ngua ipatea i tamwata Natu ñana imo patarawâña tamâta nenzi tamâta ñalae. Aku i Natu ñinde nde ikura ndo ñana iveta wurâta ñinde sondo, ma iveta mine ku imo nâ.

8

Yesu imo patarawâŋa tamâta ŋalae lâ samba lawea

¹ Maka nema ŋgua ŋine rârâni ne duvi kala mine; nenda patarawâŋa tamâta mine imo samba ilo, isaŋona lâ Koipu Ŋalae Maro Kindeni ne saŋonâŋa nia tini pa wia kâ.

² Aku i uru iveta ne wurâta ŋinde pa Maro Kindeni lâ samba lawea ne luma sapâŋa. Luma sapâŋa ŋinde nde Maro Kindeni ne luma mao. Kinzi tamâta muŋga sipa luma ŋinde lâ mbaunzi, ande tia; Maro Ŋalae tamwata ipa luma ŋinde.

³ Kinzi patarawâŋa tamâta nenzi tamâta ŋalae ne wurâta nde ŋana io wisi-ara kie-kie ilâ pa Maro Kindeni kâ, aku ne wurâta nde ŋana iveta patarawâŋa kie-kie papa i tona. Mine kala nenda patarawâŋa tamâta ŋalae Yesu ne wurâta nde ikeno mine nâ.

⁴ Kinzi patarawâŋa tamâta rârâ uru soka ŋgua tukuŋa muli ku sio patarawâŋa kie-kie ilâ pa Maro Kindeni. Mine kala, ambo Yesu imo tâno kulu yo, ande i ma imo patarawâŋa tamâta tia.

⁵ Kinzi patarawâŋa tamâta ŋinde uru siveta nenzi wurâta lâ tâno ŋine ne luma sapâŋa ilo. Andeta luma sapâŋa ŋinde nde itogo tai wa uŋa nâ, ŋana tu luma sapâŋa mao kanaŋo nde ikeno samba ilo. Ŋana duvi ŋinde kâ, nanayoni, lâ zo ŋinde Mose iluku ŋana ipa pâla sapâŋa, ande Maro Kindeni ipai tu, “Noko ma kupa pâla sapâŋa ŋinde sondo ndo, ikura tai ŋinde muŋga atula pano lâ tuu kulu”.

⁶ Andeta kala ñine Yesu imo patarawâña tamâta ñalae, aku i ne wurâta nde ara ndo, ipole patarawâña tamâta ñinde rârâni nenzi wurâta. Aku Yesu iveta nzâla pa Maro Kindeni tu ma iveta ñgua pâña wasaseki kunzi tamâta. Ñgua pâña wasaseki ñinde tava nde ara ndo, ipole ñgua pâña muñgâña. Aku lâ ñgua pâña wasaseki ñinde, ande Maro Kindeni ipa ñgua tu ma iveta kie ara ku ara ndo panzi ne tamâta.

Ñgua pâña wasaseki ipole ñgua pâña muñgâña

⁷ Miki kalomi ñgere sondo ñga. Ambo ñgua pâña muñgâña ñinde ikura ñana ivilanzi tamâta, ande Maro Kindeni ma iveta ñgua pâña wasaseki kilo tia.

⁸ Andeta Maro Kindeni ilo tu ne tamâta nenzi vetâña soki-soki ma ipâña nia yo. Mine kala nia ndoyo iporo mine tu,

“Naña Maro Ñalae apatea zo tonge lâ, aku lâ zoni ndaina naña ma aveta ñgua pâña wasaseki kunzi Isrel ñgu wa Juda ñgu wa.

⁹ Andeta ñgua pâña wasaseki ñinde ma irerege kuku ñgua pâña muñgâña naña aveta kunzi ñgu ñinde timbunzi, ande tia. Muñgani, lâ zo ñinde naña ayautenzi Isrel ñgu piti lâ Isip tâno ku akainzi sondo nâ sipile tâno ñinde siyâti simâ, ande naña aveta ñgua pâña kunzi. Andeta kinzi ñandai sipono muli pa nanenju ñgua pâña ñinde ñga. Mine kala naña Maro Ñalae apu mulingu panzi.

¹⁰ Taitu muli ñga, naña ma aveta ñgua pâña kie mine kunzi Isrel ñgu; Naña Maro Ñalae ma

angere nanenġu ngua tukuġa rârâni lâ ilonzi kalonzi, ku ma aveta kinzi kalonzi ngere sondo nana ngua tukuġa nġinde kâ. Nana ma amo nenzi Maro Kindeni, aku kinzi kala ma simo nanenġu tamâta.

¹¹ Aku lâ zo nġinde, tamâta tonġe ma ipanananzi ninambwe wukale tavanzi i nuwala kinzi nana nana Maro Nġalae kilalânġu kâ, ande tia. Nana tu tamâta rârâni, kinzi sugorai tamwatanzi wa tamâta nġalaġala wa, kinzi rârâni ma sisama nana

'kilalânġu.

¹² Nana tu nana ma azavaru nenzi kiesaka piti lâ tininzi, aku ma kalonġu ngere kilo nana nenzi vetâna soki-soki kâ, ande tia ndo."

¹³ Maro Kindeni iporo tu nġinde nde ngua pânġa wasaseki, aku ngua nġinde iveta ngua pânġa muġġânġa ipânġa kelekele sinġa lâ. Aku kelekele sinġa uru ikeno zo mbwana-mbwana nâ, nġinenġa ma nao tia lâ.

9

Kinzi patarawânġa tamâta muġġânġa uru siveta patarawânġa kie tonġe

¹ Ngua pânġa muġġânġa nġinde itula tukuġa pwataki nana tamâta nenzi mâsi nana siwânġi sipanea Maro Kindeni kâ. Aku ngua pânġa nġinde ne luma sapânġa ikeno lâ tâno nġine kulu tona.

² Muġġa kinzi sinġunu pâla sapânġa tonġe imandi. Pâla nġinde ne ilo kisinġa pwataki tonġe ikeno pa nao, aku sipatu nia nġinde nana tu "Nia Sapânġa". Kelekele pinde ikeno nia nġinde; sinâla

ne tukâla wa kâro-kâro wa puronja ninde kinzi sio ndue lâ Maro Kindeni nao.

³ Kinzi sisunja lalava luandondo tonje, ne matatola njalae, itâra lâ “Nia Sapânja” ninde ilo pa muli kâ. Aku luma ilo kisinja pwataki tonje ikeno lalava matatola ninde muli. Kinzi sipatu nia ninde nja tu, “Nia Sapânja Ndo”.

⁴ Patarawânja nia “gol” tonje ikeno “Nia Sapânja Ndo” ninde ilo. Ninde nde nia njana simomo mire kuwae ara kâki. Aku njua pânja munjânja ne sopi kala ikeno tona, ninde mira “gol” itura ndo lâ. Aku kâpwa “mana” ne kondo “gol” ikeno lâ sopi ninde ilo, tava timbunda Aron ne tukâla njana yokânja kâ, tukâla ninde munja mata ipânja irumba lâ tini. Aku njua pânja ne mira rua kala ikeno lâ sopi ninde ilo tona. Ninde nde mira njalanjala ninde Maro Kindeni munja injere ne tukuja lâ tini.

⁵ Anja lâ sopi ninde kulu, ande nia tonje ikeno. Ninde nde nia njana Maro Kindeni ma ikai tamâta nenzi kiesaka piti kâ. Aku njelo rua tainzi kala simandi lâ sopi ninde kulu tona. Kinzi munja sipa tainzi ninde lâ mira “gol”, aku kinzi rua simazara mbaninzi njana sipono sopi ninde kawa kâ. Anjelo rua ninde nde njana situla pwataki tu Maro Kindeni uru imo niani ndaina. Taitu njine maka ma kaporo njua njalae konja njana kelekele ninde kâ, ande tia.

⁶ Kinzi munja sio kelekele rârâni ninde ikeno mine, aku ikura zo rârâni kinzi patarawânja tamâta uru silâ pâla sapânja ilo njana siveta nenzi wurâta kâ. Taitu kinzi siveta wurâta lâ “Nia Sapânja” ninde nâ; kinzi njandai silâ “Nia Sapânja

Ndo” ilo nga.

⁷ Anga kinzi patarawâŋa tamâta nenzi tamâta ŋalae, i simbo nâ ikura tu ilâ “Nia Sapâŋa Ndo” ikeno pa muli ŋinde. I uru iveta mine mbwani taitu nâ ikura mbwera mbwera. Andeta i ŋandai iyoka mbau kaa nâ ilâ pa nia ŋinde nga. I uru ikai see, ŋinenŋa ilâ luma kisiŋa pwataki ŋinde ilo. Aku i uru ipatarâwa see ŋinde ŋana izavaru i tamwata ne kiesaka piti lâ tini, aku ŋana izavaru kinzi tamâta nenzi kiesaka piti lâ tininzi tona. Ŋinde nde kiesaka ndia muŋga siveta, andeta sizizâla tu vetâŋa ŋinde nde kiesaka.

⁸ Koroani Sapâŋa itula mâsi ŋinde ne duvi pwataki mine; tâno ŋine ne luma sapâŋa nde ikeno mo ŋai yo. Mine kala lâ zo ŋinde, nzâla ŋana tamâta ma silâ samba lawea ne luma sapâŋa ilo ŋinde, ande ikeno paveâŋa yo.

⁹ Mâsi ŋinde itula zo kala tamo ŋine kilala pwataki. Ŋinde itula pwataki tu lâ zo ndia tamâta siwâŋgi pa Maro Kindeni aku wisi-ara kie-kie tava patarawâŋa kie-kie silua, ande kelekele ŋinde ikura tu ivetanzi sondo, ande tia. Mine kala kinzi sipasama lâ warakanzi ilonzi kalonzi tu nenzi kiesaka ikeno mo ŋai yo.

¹⁰ Wisi-ara wa patarawâŋa ŋinde, ande ŋgua tukuŋa ne kelekele nâ ŋana tamâta nenzi kâŋa-nuŋa tava mâsi kie-kie siveta ŋana izavaru muso piti lâ tininzi. Ŋgua tukuŋa ŋinde nde ŋana karaenda ne kelekele nâ, aku Maro Kindeni muŋgani ipatea tu tamâta ma sipaveta kuku ŋgua tukuŋa ŋinde lee, ikura lâ zo ŋinde i ma itula nzâla wasaseki.

Kirisi ipatarâwa i tamwata see

¹¹ Andeta Kirisi nde ipânnga lâ, kala imo patarawâña tamâta ñalae ñana zo ñine ne vetâña ara kâ. I uru iveta wurâta lâ samba ne luma sapâña ara ñinde ilo, ñana ivila kinda kâ. Luma sapâña ñinde nde sondo ndo, ipole tâno ñine ne luma sapâña. Kinzi tamâta muñga sipa luma sapâña ñinde lâ mbalaunzi, ande tia, ñana tu luma ñinde ñandai tâno ñine ne kelekele ñga.

¹² Kirisi nde ilâ samba ne luma sapâña ñinde ilo mbwani taitu nâ. Andeta lâ zo ñinde i ñandai ikai “meme” seenzi wa bulmakao seenzi ku iveta ne patarawâña ñga. Ipatarâwa i tamwata see nâ ñana iyaute kinda piti lâ kondoma ilo, ñana ma tamo ara mine ku tamo nâ.

¹³ Ambo tamâta tonje iveta soki, aku tukuña itula pwataki tu vetâña ñinde iveta muso papa i lâ Maro Kindeni nao, ande patarawâña tamâta ma iveta mâsi pinde ñana izavaru muso ñinde piti kâ. I ma ikai “meme” seenzi wa bulmakao seenzi wa, ku ma itapila see ñinde lâ tamâta ñinde tini. Aku i ma imomo bulmakao natu tonje lâ yââ kulu, ñineñga ma iliji yââ ñinde ne kââ lâ tamâta ñinde tini tona.

¹⁴ Anğa Kirisi see nde ivila kinda ñalae tina, aku ñine ipole patarawâña tamâta nenzi mâsi ñinde ndo lâ. Koroani Sapâña imo via ku imo nâ, aku ina isuka Kirisi ñana ipatarâwa tamwata lâ kâi popole tini. Lâ zo ñana Kirisi ipatarâwa tamwata pa Maro Kindeni, ande kiesaka tonje ikeno i tini tia ndo. Muñga, kinda tamo tava ilonda malia ndo, ñana tu ñgua tukuña itula pwataki tu Maro Kindeni ma imora nenda

vetâṅa soki, aku ma iṅara kinda piti lâ i nao. Andeta Kirisi ne patarawâṅa ara ṅinde iveta kinda tamo sonḍo ndo lâ Maro Kindeni Via Tamwata nao. Mine kala kinda takura tu taveta wurâta sonḍo papa i.

Kirisi see ikai nzâla piti pa ṅgua pâṅa wasaseki tu imâ

¹⁵ Yesu Kirisi see iveta kinda tapâṅga ilonda mbâra-mbâra ndo lâ Maro Kindeni nao. Mine kala Kirisi ikai nzâla piti pa ṅgua pâṅa wasaseki kâ. Aku i ne mateṅa ṅinde ikonzi tamâta piti ku izavaru nenzi kiesaka piti lâ tininzi, kiesaka ṅinde siveta lâ ṅgua pâṅa muṅgâṅa ne zo. Mine nde tamâta ea kinzi siloṅo Maro Kindeni ne sarawâṅa ku sipono muli papa i, ande kinzi ṅinde rârâni sikura tu sikai via mao ṅinde Maro Kindeni muṅga ipa ṅgua tu ma ilanzi, ma simo ara mine ku simo nâ.

¹⁶ Ambo tamâta tonḅe isama tu i ma muli imâte, aku itu itula ṅgua pwataki ṅana tamâta ea ma ikai ne mbaliṅa kâ, ande i ma iṅgere ṅgua ṅinde lâ pepa tini, itogo ṅgua pâṅa mine. Ambo i natu itu ikai kelekele ṅinde tama muṅga ipatea papa, ande i ma itula pwataki panzi tamâta ṅalaṅala tu i tama nde imâte lâ. ṅineṅga kinzi ma sisâu pa natu ṅinde ṅana ma imâ ikai tama ne mbaliṅa ṅinde kâ.

¹⁷ Ambo i tama ṅinde nde imâte tia yo, ande i ne ṅgua pâṅa ṅinde nde itogo kelekele kaa nâ. Andeta lâ zo ṅana imâte kâ, ande lâ zoni ndaina ne ṅgua pâṅa ṅinde ma ipâṅga kanaṅo.

¹⁸ Aku kinzi patarawâṅa tamâta kala uru siveta mâsi kie taituni. Kinzi uru sipunzi simbi

simâte, ñinenḡa sipaliṅi simbi seenzi ḡana iveta ḡgua pânḡa muṅḡaṅa ḡinde ipânḡa kanaḡo kâ.

¹⁹ Nia ndoyo, Mose itula tukuṅa rârâni pwataki panzi tamâta rârâni. Iveta mine lâ, ñinenḡa ikai bulmakao seenzi wa “meme” seenzi wa, aku igema tava lââ vâra-vâra. Ñinenḡa ikai kâi “hisop” laka kiri-kiri pinde, muṅḡa sipa kaika lâ wâlo ḡiṅi. Kinzi muṅḡa siveta wâlo ḡiṅi ḡinde lâ lama pwau. Ñinenḡa Mose ipatuku laka ḡinde ndue see ilo, aku ikai kâki itapala see tini-tini lâ ḡgua tukuṅa ne pepa tini. Aku itapala see ḡinde lâ tamâta rârâni tininzi mine nâ.

²⁰ Mose iveta mâsi mine, aku iporo mine tu, “Muṅḡa Maro Kindeni iporo ḡgua kaika tu miki ma kaponu muli papa i ne ḡgua pânḡa. Aku see ḡine nde ḡana iveta ḡgua pânḡa ḡinde ipânḡa kanaḡo kâ.”

²¹ Aku Mose kala iveta mâsi kie taituni nâ, ku itapala see ḡinde lâ pâla sapânḡa tini. Aku itapala lâ kelekele rârâni ikenu luma ḡinde ilo tona.

²² Mao nâ, ḡgua tukuṅa itula pwataki tu see nâ ikura ḡana iveta kelekele rârâ ḡinde sipânḡa mbâra-mbâra lâ Maro Kindeni nao. Ambo see ma imaliṅi tia, ande Maro Kindeni ma izavaru tamâta nenzi kiesaka piti lâ tininzi, ande tia.

Kirisi ipatarâwa i tamwata ḡana izavaru nenda kiesaka piti kâ

²³ Mose itapala see mine ḡana iveta kelekele kaa ḡinde ipânḡa mbâra-mbâra lâ Maro Kindeni nao. Andeta pâla sapânḡa ne kelekele ḡinde rârâni nde itogo uṅa nâ, aṅḡa kelekele mao nde ikenu samba ilo. Aku mâsi ḡana iveta samba ne kelekele mao tu ipânḡa mbâra-mbâra kâ, ande

mâsi tonje. Aku mâsi ñinde ne patarawâña nde ara pâta, ipole patarawâña kie-kie rârâni siveta lâ simbi tini.

²⁴ Kinzi tamâta sipa tâno ñine ne luma sapâña ñinde lâ mbalaunzi, aku luma sapâña ñinde nde itogo Maro Kindeni ne luma sapâña mao ne uña nâ. Andeta Kirisi ñandai ilâ tâno ñine ne luma sapâña ñinde ilo ñana iveta ne patarawâña ñga. Ikâki ilâ samba ilo, kala ñine imandi Maro Kindeni nao iveta wurâta ñana ivila kinda kâ.

²⁵ Ikura mbwera mbwera, patarawâña tamâta nenzi tamâta ñalae uru ikai simbi seenzi nâ ilâ pa luma sapâña ne “Nia Sapâña Ndo”. I uru iveta mine mbwani taitu nâ ikura mbwera mbwera ñana iveta patarawâña kâ. Anja Kirisi nde iveta mine tia. I ilâ samba ilo, andeta i ñandai ipatarâwa tamwata mbwani rârâ ñga.

²⁶ Nia ndoyo, lâ zo ñinde Maro Kindeni ipulia tâno ipâña lâ, aku imâ lee ipâña lâ zo ñine, ambo Kirisi ma ipatarâwa tamwata mbwani rârâ, ande ñinde ma itogo ikai nâna mbwani rârâ tona. Andeta tia. Kala ñine tâno ne zo laiti ñana marumbu kâ, aku Kirisi ipâña mbwani taitu nâ lâ tâno kulu ñana ipatarâwa tamwata pa Maro Kindeni. I ne patarawâña ñinde izavaru kiesaka piti lâ tamâta tininzi marumbu lâ, aku i ma iveta mine kilo tia ku tia ndo.

²⁷ Maro Kindeni ipatea tu kinda tamâta rârâni taitu-taitu ma tamâte mbwaninda taitu mai nâ, aku muli, ñinenja kinda rârâni ma tamandi lâ i ne ñgua nia.

²⁸ Aku Kirisi kala mine nâ ipatarâwa tamwata pa Maro Kindeni mbwani taitu nâ ñana izavaru

tamâta rârâ nenzi kiesaka piti kê. Aku muli i ma itaulo imâ ipângga kilo. Taitu lâ zo muli ñinde, ande i ma imâ ñana izavaru kiesaka piti kilo kê, ande tia. I ma imâ ñana iyautenzi tamâta piti kê, kinzi ñinde uru simo sio tininzi ñana i kê. Aku i ma via mao ilanzi.

10

Patarawâña munğâña ikura tu izavaru kiesaka piti kê, ande tia

¹ Mose ne ñgua tukuña nde itogo uña nâ ñana kelekele ara ñinde ma muli ipângga. Andeta ñgua tukuña ñinde ñandai itula kelekele mao ñinde ipângga nia yo. Kinzi tamâta uru siveta ñgua tukuña ñinde ne patarawâña lâ mâsi kie taituni ikura mbwera mbwera. Mine nde kinda tasama tu tamâta ea imâ pa Maro Kindeni ñana iveta ñgua tukuña ne patarawâña kê, ande patarawâña ñinde ikura tu iveta tamâta ñinde ipângga sondo lâ Maro Kindeni nao, ande tia ndo.

² Ambo ñgua tukuña ñinde ma ikura tu ivetanzi tamâta ñinde sipângga sondo lâ Maro Kindeni nao, ande kinzi ma ilonzi malia kilo ñana nenzi kiesaka kê, ande tia. Ambo mine, ande kinzi ma siveta patarawâña tonje kilo tia.

³ Andeta tia. Ikura mbwera mbwera, patarawâña ñinde uru iveta nenzi kalo-ñgere ipângga kilo ñana nenzi kiesaka kê,

⁴ ñana tu bulmakao seenzi wa “meme” seenzi wa ikura ñana izavaru tamâta nenzi kiesaka piti kê, ande tia ndo.

⁵ Mine kala lâ zo ñinde Kirisi imâ ipângga tâno kulu, ande iporo pa Maro Kindeni mine tu,

“ ‘Noko tini pwâka ñana simbi wa kâpwa kie-kie ñinde kinzi tamâta uru sipatarâwa pano. Andeta noko kupatea tu naña ma apânga tamâta.

⁶ Kinzi tamâta uru simomonzi simbi lâ yââ kulu, aku siveta patarawâña kie-kie ñana izavaru nenzi kiesaka piti kâ. Taitu noko kundeka ñana vetâña mine kâ, ande tia.”

⁷ Aku Kirisi kala iporo ñgua tonje kilo mine tu,

“ ‘Maro Kindeni, naña warakângu amo ñai mbo. Naña amâ apânga lâ, aku naña ma aveta vetâña ndia noko kupatea pa naña ñinde, ikura ñgua kinzi ñgua-tulâña tamâta singere lâ pepa tini mine.”

⁸ Miki kalomi ñgere sondu ñga. Lâ zo ñinde, tukuña ikeno tu tamâta ma siveta patarawâña kie-kie mine. Andeta Kirisi iporo ñgua pa Maro Kindeni mine tu, “Noko tini pwâka ñana simbi wa kâpwa kie-kie kinzi tamâta uru sipatarâwa pano, aku noko tini pwâka ñana simbi kinzi simomo lâ yââ kulu, wa patarawâña kie-kie ñana izavaru kiesaka kâ wa. Noko kundeka ñana kelekele rârâni ñinde kâ, ande tia.”

⁹ Ninenğa Kirisi iporo mine tu, “Maro Kindeni, naña warakângu amo ñai mbo, aku naña ma aveta vetâña ndia noko kupatea pa naña ñinde.” Mine kala Maro Kindeni ikai patarawâña muñgâña ñinde piti lâ, ku iveta Kirisi ne patarawâña ipânga kanaño.

¹⁰ Yesu Kirisi iveta ikura Maro Kindeni ne pateâña mine, aku io tamwata karae ilâ itogo patarawâña mine mbwani taitu mai nâ. Aku i ne

patarawâŋa ŋinde nde izavaru kiesaka ne muso piti ndo lâ kinda rârâni ilonda kalonda.

Kirisi ne patarawâŋa ikura ndo ŋana izavaru kiesaka piti kâ

¹¹ Kinzi patarawâŋa tamâta uru siveta nenzi wurâta ikura zo zo, aku siveta patarawâŋa lâ mâsi kie taituni mbwaninzi rârâ ŋinde. Taitu patarawâŋa mine ikura ŋana izavaru kiesaka piti kâ, ande tia ndo.

¹² Aŋga Kirisi, ina patarawâŋa tamâta mao, ande iveta ne patarawâŋa mbwani taitu nâ lâ zo taitu, aku patarawâŋa taitu ŋinde nde ŋana izavaru kiesaka piti ikura zo rârâni. Iveta mine lâ, ŋinenŋa isaŋona Maro Kindeni tini pa wia kâ.

¹³ Kala ŋine imo niani ndaina ku io tini ŋana Maro Kindeni ne zo ŋana ionzi ne kazâŋa tamâta simo i kalo kâ.

¹⁴ Mine kala ŋana i ne patarawâŋa taitu ŋinde kâ, ande ivetanzi tamâta pinde simo sondo ndo, kinzi ŋinde Maro Kindeni izavaru kiesaka ne muso piti lâ ilonzi kala sipono muli sondo pa i. Aku kinzi ma simo ara mine ku simo nâ.

¹⁵ Aku Koroani Sapâŋa kala itula ŋgua pwataki pa kinda lâ ŋgua-tulâŋa tamâta Jeremaia kawa mine nâ. Iporo ŋgua mine tu,

¹⁶ “Maro Ŋalae kawa ŋgua ikeno mine; ‘Muli ŋga, naŋa ma aveta ŋgua pâŋa kie mine kunzi: naŋa Maro Ŋalae ma aŋgere nanenŋu ŋgua tukuŋa rârâni lâ ilonzi kalonzi, ku ma aveta kinzi kalonzi ŋgere sondo ŋana tukuŋa ŋinde kâ.’ ”

¹⁷ Njinennga Koroani Sapâña isenḡe ḡgua tonḡe kilo mine tu,

“Naja ma kalonḡu ḡgere kilo ḡana nenzi kiesaka wa nenzi vetâña soki-soki wa, ande tia ndo.”

¹⁸ Maro Kindeni izavaru kiesaka wa vetâña soki-soki ḡinde piti lâ tininda marumbu lâ. Mine kala wurâta ikeno panzi tamâta tu ma siveta patarawâña kilo ḡana izavaru kiesaka piti kê, ande tia.

Ara ḡana kinda ma kalonda tawana sondo, aku talâ tamo Maro Kindeni tini laiti

¹⁹ Niḡngu-nambwe wukale, Yesu ipaliḡi i tamwata see ḡana izavaru nenda kiesaka piti kê. Mine kala lâ zo ndia kinda takai noḡa pa Maro Kindeni, ande kinda takura ḡana talâ tamo “Nia Sapâña Ndo” ḡinde ikeno i ne luma ilo, aku sâ tonḡe ikura tu ipono nzâla pa kinda kê, ande tia.

²⁰ Yesu imâte lâ, ḡinenḡa imandi imo via kilo, aku ḡinde itogo ikai luma sapâña ne lalava matatola ḡinde piti lâ. Aku i ne vetâña ḡinde iveta nzâla wasaseki pa kinda ḡana talâ tamo Maro Kindeni tini laiti.

²¹ Kinda nenda patarawâña tamâta ḡalae imo, aku i uru ikatona samba ne luma sapâña.

²² Mine kala lâ zo ndia kinda ilonda tu talâ tamo Maro Kindeni tini laiti, ande ara ḡana nenda kalo-tawana ma ikeno sondo papa i, aku ara ḡana ma tapile mâsi ḡana ilonda rua-rua kê. Muḡḡa kinda ilonda malia ḡana nenda kiesaka kê, andeta i izavaru malia ḡinde piti lâ ilonda kalonda lâ. Aku ikai lââ ara ndo ku ipua tininda, kala kinda tapâḡḡa mbâra-mbâra ndo lâ i nao.

²³ Kinda uru tatula nenda kalo-tawana pwataki panzi tamâta, aku taporo ñana vetâña ara ñinde kinda tao tininda pa Maro Kindeni tu ma iveta pa kinda. Aku kinda tasama tu Maro Kindeni uru iveta vetâña rârâni i muᅅga ipambwâre tu ma iveta ñinde. Mine nde ara ñana kinda ma kalonda tawana kaika ku tao tininda mine ku tamo nâ.

²⁴ Aku ara ñana kinda rârâni taitu-taitu ma kalonda ᅅgere tona ñana vetâña pinde kinda ma taveta ñana ipaᅅo ninda-nambwe ilonzi kalonzi, ñana kinzi ma tininzi mwasa panzi tininzi pinde ku siveta kenzi ara panzi.

²⁵ Tamâta pinde nde sipile mâsi ñana simâ taitu sipasau kunzi ninzi-nambwe kalo-tawana tamâta, aku ñinde nde ara tia ndo. Miki kasama tu Maro Ñalae ne zo nde imâ ipâᅅga laiti lâ. Mine nde ara ñana kinda taitu-taitu ma taveta wurâta kaika ñana tapu tini kaika panzi nawalânda pinde.

Kinda ma tapu mulinda pa Maro Kindeni Natu ndimo

²⁶ Miki kaloᅅo ᅅga; ambo tamâta tonᅅe iloᅅo pâri ara mao ñana Yesu Kirisi kâ, aku ipono muli papa, andeta muli ᅅga i tamwata ilo patea tu ma ipaveta kuku kiesaka ne vetâña kilo, ande patarawâña tonᅅe ikeno ñana izavaru tamâta ñinde ne kiesaka piti kâ, ande tia.

²⁷ Nzâla taitu nâ ikeno papa tamâta mine. I ma iruru ndo, aku ma indaᅅe Maro Kindeni ne zo ñana ipare nia panzi tamâta kâ. Zo ñalae ñinde

nde imâ ipângga laiti lâ, aku lâ zo ñinde yââ mela-mela kaika ñinde ma ikananzi Maro Kindeni ne kazâña tamâta.

²⁸ Kinda tasama ñine; muñga, ambo tamâta tonje ilaņa ipole Mose ne tukuņa, aku tamâta rua wa ñato simora i ne vetâña soki ñinde ku situla pwataki lâ, ande kinzi tamâta ñalañala ma sigera tamâta ñinde tia ndo. Kinzi ma sipu i pâta imâte.

²⁹ Miki kalomi ñgere sondo ñga. Ambo vetâña kie mine ipângga panzi tamâta ñinde silaņa sipole Mose ne ñgua tukuņa, ande vetâña kie mana ma ipângga pa tamâta ipu muli pa Maro Kindeni Natu, a? Opopo, tamâta ñinde ma ikai nâna ñalae tina, ñana tu Yesu Kirişi ipaliñi tamwata see ñana ikai ñgua pâña wasaseki ne nzâla piti, aku i see ñinde izavaru kiesaka ne muso piti lâ tamâta ñinde ilo. Andeta tamâta ñinde ne vetâña iveta Yesu see ñinde ipângga itogo kelekele sugorai nâ mine. Aku ñinde itogo tamâta ñinde iporo ñgua pavaligiña pa Koroani Sapâña, ina wisi-wisi warika.

³⁰ Kinda tasama Maro Kindeni kilala, ina muñga iporo mine tu, “Naña warakâñgu akatona pareña-nia. Naña warakâñgu nâ ma akatu tamâta nenzi vetâña soki panzi.” Aku i kala iporo ñgua tonje kilo mine tu, “Maro ñalae simbo nâ ma imandi lâ ñgua nia ku ma itunzi ne tamâta sondo ñana nenzi vetâña kâ.”

³¹ Ambo Maro Kindeni Via Tamwata ma ikai kazâña pa tamâta tonje, ande tamâta ñinde ma iruru pâta kanaño.

Kinda ma tamandi kaika ɲana nenda kalo-tawana kâ

³² Mine nde ara ɲana miki ma kalomi ɲgere sondo ɲana zo muɲgâɲa kâ. Lâ zo ɲinde, miki nemi kalo-tawana ikeno pa Yesu Kirisi, aku Maro Kindeni ne sinâla uru isinalami. Andeta tamâta pinde ilonzi sakamao ɲana nemi kalo-tawana kâ kala siveta kenzi sakamao pami, aku miki kakai nâna ɲalae tina. Andeta miki kamandi kaika lâ, aku malia ɲinde ɲandai ipolemi ɲga.

³³ Zo pinde kinzi sio miki warakami kamandi lâ tamâta naonzi, ɲinenɲa siporo ɲgua pavaligiɲa pami wa siveta vetâɲa soki pami wa. Aɲga zo pinde siveta kenzi mine nâ panzi nimi-nambwe kalo-tawana tamâta pinde, aku miki kamandi ɲana kasukanzi nawalami ɲinde kâ.

³⁴ Aɲga zo pinde kinzi sionzi nawalami pinde simo luma sakamao ilo, aku lâ zo ɲinde miki kalomi sukâɲa ku ilomi malia ɲananzi nawalami ɲinde. Aku lâ zo pinde tamâta pinde sitapa nemi mbaliɲa rârâni saɲemi. Andeta lâ zo ɲinde miki ilomi ara ku kandeka nâ, ɲana tu miki kasama ɲine; nemi mbaliɲa mao nde keno mo ɲai yo. Mbaliɲa ɲinde nde ara ndo ku ipole tâno ɲine ne kelekele, ɲana tu mbaliɲa ɲinde ma nao tia kâ, ande tia. ɲinde ma ikeno mine ku imo nâ.

³⁵ Mine nde ara ɲana miki ma kalomi ɲgere sondo ɲana vetâɲa arara ɲinde miki muɲga kaveta. Miki ma kapile nemi kalo-tawana ndimo. Ambo nemi kalo-tawana ma ikeno kaika, ande muli miki ma kakai kulu ɲalae tina.

³⁶ Ara ɲana miki ma kamandi kaika, ikura Maro Kindeni ne pateâɲa mine. Ambo miki ma

kaveta mine, ande Maro Kindeni ma iveta kie ara pami, ikura muŋga ipa ŋgua tu ma iveta mine.

³⁷ Maro Kindeni kawa ŋgua ikeno lâ pepa tini mine tu,

“ Zo laiti lâ ŋana i ma imâ kê. I ma imâ ipâŋga walele nâ.

³⁸ Aku tamâta ea kinzi uru siveta ikura nanenġu pateâŋa mine, ande kinzi ŋinde ma simo nanenġu tamâta. Kinzi ma kalonzi tawana naŋa, aku ŋana duvi ŋinde kê kinzi ma simo vianzi nâ. Taitu kaloŋo ŋga; ambo tamâta tonġe ma ipile ne kalo-tawana, ande naŋa ma ilonġu ara papa i, ande tia.”

³⁹ Taitu kinda ŋandai tamâta ŋana tapile nenda kalo-tawana kala tasânda zavaruŋa kulu ŋga. Kinda nenda kalo-tawana ikeno kaika lâ, kala takai via mao ŋinde marumbu lâ.

11

Kalo-tawana mao nde kilala mine

¹ Ambo tamâta tonġe ne kalo-tawana ikeno mao pa Maro Kindeni, ande i ma isama mine; muŋgani Maro Kindeni ipa ŋgua tu ma iveta vetâŋa ara pa kinda, aku i ma iveta vetâŋani ndaina rârâni ipâŋga. Kinda uru tao tininda ŋana i tu ma iveta mine. Kinda ŋandai tamora vetâŋa ŋinde kanaŋo pwataki lâ matânda ŋga, taitu tasama tu sâ tonġe ikura tu ipono nzâla ŋana vetâŋa ŋinde kê, ande tia ndo.

² Nia ndoyo, timbunda pinde nenzi kalo-tawana ikeno mine nâ pa Maro Kindeni. Mine kala i ilo ara ndo panzi tamâta ŋinde.

³ Kinda kalonda tawana Maro Kindeni. Mine nde kinda tasama tu nia ndoyo i iporo ŋgua, aku i kawa ŋgua ŋinde ipulianzi samba tava tâno sipâŋga lâ. Ikai kelekele pinde kinda takura tu tamora lâ matânda tia, aku iveta kelekele rârâni ŋine uru tamora lâ matânda.

Abel, Enoko aŋga Noa, kinzi ŋato nenzi kalo-tawana ikeno pa Maro Kindeni

⁴ Nia ndoyo, kinda timbunda Abel i kalo tawana Maro Kindeni. Mine kala iveta patarawâŋa papa i, aku Maro Kindeni ilo ara papa Abel ne patarawâŋa ŋinde. Aŋga i tua Kein ne patarawâŋa, ande Maro Kindeni tini pwâka ŋana. Abel ne kalo-tawana ikeno pa Maro Kindeni, aku ŋana duvi ŋinde kâ ipâŋga tamâta ara ndo lâ Maro Kindeni nao. Maro Kindeni tamwata ilo ara nâ papa Abel ne patarawâŋa rârâni. Abel nde imâte lâ, andeta i ne kalo-tawana ŋinde uru ipanana kinda ikura zo rârâni.

⁵ Aku kinda timbunda Enoko, i kala kalo tawana Maro Kindeni. Mine kala Maro Kindeni ikai ilâ samba ilo, lâ zo ŋinde Enoko imo via yo. Kinzi tamâta siroto ŋana Enoko lee, andeta simora i nao tia, ŋana tu Maro Kindeni ikai i piti lâ tâno kulu lâ. Aku Maro Kindeni kawa ŋgua ikeno lâ pepa tini mine tu, lâ zo ŋinde ikai Enoko ikâki ilâ samba ilo tia yo yo, ande Enoko ne vetâŋa nde ara ndo lâ i nao.

⁶ Ambo tamâta tonje ne kalo-tawana ikeno pa Maro Kindeni tia, ande Maro Kindeni ma ilo ara pa tamâta ŋinde, ande tia ndo. Tamâta ea itu ma ilâ imo Maro Kindeni tini laiti, ande nzâla ikeno mine; i ma kalo tawana tu Maro Kindeni

imo, aku i uru iveta kie ara nâ panzi tamâta ea siroto n̄alae n̄ana i tamwata kâ.

⁷ Aku kinda timbunda Noa, i kala kalo tawana Maro Kindeni. Mine kala Maro Kindeni itu n̄gua kaika papa n̄ana malia ton̄ge ma muli ip̄n̄ga. Mâsi n̄inde ip̄n̄ga pa Noa tia yo, andeta imege n̄ana Maro Kindeni kawa n̄gua kâ, kala ipa w̄n̄ga n̄alae ton̄ge. N̄inen̄ga Noa tavanzi i kaiwa-natu r̄âr̄ani silâ w̄n̄ga n̄inde ilo, aku simo ara nâ, sipayaula tia. Noa ne kalo-tawana n̄inde itula pwataki tu tâno tamâta r̄âr̄ani nde kiesaka tamwatanzi. Noa ne kalo-tawana ikeno pa Maro Kindeni, aku n̄ana kalo-tawana n̄inde kâ ip̄n̄ga tamâta ara lâ Maro Kindeni nao, itogonzi tamâta r̄âr̄ani uru kalonzi tawana Maro Kindeni mine.

Abraham ne kalo-tawana ikeno pa Maro Kindeni

⁸ Aku kinda timbunda Abraham, i kala kalo tawana Maro Kindeni. Mine kala lâ zo n̄inde Maro Kindeni isarawa i, ande Abraham ipono muli pa n̄gua n̄inde. Ipile ne lawea, aku iyoka ilâ pa tâno ton̄ge Maro Kindeni ipa n̄gua tu ma muli ilua i itogo i tamwata ne tâno mine. Abraham nde izizâla tu i ma ilâ pa nia ndia, taitu i kalo tawana nâ kala ilâ.

⁹ Abraham ne kalo-tawana ikeno pa Maro Kindeni. Mine kala ilâ imo tâno n̄inde Maro Kindeni mun̄ga ipatea papa, aku imo tâno n̄inde itogo tamâta lombo mwasina. I uru imo pâla nâ ilo, aku muli, i natu Isaka tava Isaka natu Yakopu, kinzi rua kala simo pâla nâ ilo mine nâ. Maro Kindeni ne n̄gua p̄n̄ga itula pwataki tu i ma tâno n̄inde ilua Abraham ne v̄asa kinzi tona.

¹⁰ Abraham imo itogo tamâta lombo mine, andeta i ilo ara nâ, nana tu io tini nana zo ninde i ma ilâ ipângga lâ lawea kaika ninde Maro Kindeni tamwata ipatea tu ma iveta, ninenga ipa kâki lâ ikeno.

¹¹ Aku Abraham kaiwa Sara kala kalo tawana Maro Kindeni. I nde koja lâ, aku i ninga ndo lâ. Andeta Maro Kindeni muḡgani ipa ngua tu Abraham ma ipulianzi vâsa rârâ, aku Sara isama tu Maro Kindeni ne ngua pâḡa rârâni ma ipângga kanaḡo. Sara i kalo tawana Maro Kindeni, aku nana duvi ninde kâ Maro Kindeni iveta i tu ikura nana ipulianzi ne vâsa, kala Abraham kuku Sara rua natunzi ipângga lâ.

¹² Mao nâ, Abraham ne vâsa tonḡe tia, aku i koja lâ, ne zo laiti nana imâte kâ. Ninenga i ne vâsa sipângga kambwanḡenzi. Kinzi kambwanḡenzi ḡalae tina, itogo pîtu simo samba tini wa paulo ikeno sâwa mine.

¹³ Kinda timbunda ninde nenzi kalo-tawana ikeno mine pa Maro Kindeni lee, ninenga simâte lâ. Lâ zo ninde kinzi simo vianzi lâ tâno kulu, ande Maro Kindeni ne ngua pâḡa ninde ḡandai ipângga kanaḡo panzi ḡga. Ninde itogo matanzi silea ilâ pa ngua pâḡa ninde kanaḡo, andeta kanaḡo ninde ikeno malawae ndo ḡananzi. Aku kinzi sindeka nâ nana simora ngua pâḡa ninde kanaḡo. Kinzi siporo tu, “Maka nde kamo malawae ndo nana nema tâno mao ninde kâ. Maka kamo tâno ḡine katogonzi tamâta lombo mine.” Kinzi siporo ngua kaḡa mine, andeta mainzi tia.

¹⁴ Tamâta ea kinzi siporo ngua kaḡa mine,

ande ɲgua ɲinde itula pwataki tu kinzi uru sio tininzi ɲana zo muli ɲinde kinzi ma sikai warakanzi nenzi tâno mao.

¹⁵ Ambo kinzi ma ilonzi tu sitaulo silâ pa tâno singa muɲga sipile ɲinde, ande nzâla ikeno.

¹⁶ Taitu kinzi ilonzi tu sitaulo silâ pa nenzi tâno singa ɲinde, ande tia. Kinzi ilonzi ndo tu ma sikai tâno ɲinde ikeno samba ilo, aku tâno ɲinde nde ara ndo, ipole tâno singa ɲinde. Kinzi tamâta ɲinde uru siporo pa Maro Kindeni mine tu, “Noko nde maka nema Maro Kindeni”, aku i mai ɲana nenzi ɲgua ɲinde kâ ande tia, ɲana tu iveta lawea tonje panzi lâ, ɲana ma silâ simo ɲinde.

¹⁷⁻¹⁸ Abraham i kalo tawana Maro Kindeni. Mine kala lâ zo ɲinde Maro Kindeni ikai samâɲa papa ku ipai tu, “Noko ma kupu noko natu taituni Isaka pâta imâte, itogo patarawâɲa pa naɲa mine”, ande Abraham imandi ɲana ipono muli pa Maro Kindeni kawa ɲgua ɲinde kâ. Muɲgani Maro Kindeni ipa ɲgua kuku Abraham ku ipai tu, “Noko ne vâsa ɲinde rârâni ma sipâɲga lâ Isaka natu-timbu nâ”. Andeta Abraham ne kalo-tawana igagati i ilo, kala imandi ɲana ipu natuni ndaina pâta imâte kâ.

¹⁹ I ilo patea tu ambo Isaka ma imâte, ande Maro Kindeni ikura ɲana ipaɲo i imo via kilo. Mine kala kinda takura ɲana tasia ɲgua mine tu, “Abraham ikai natu taulo imâ kilo lâ mateɲa nianzi.”

Isaka, Yakopu aɲga Yosepe, kinzi ɲato nenzi kalo-tawana ikeno pa Maro Kindeni

²⁰ Aku kinda timbunda Isaka, i kala kalo tawana Maro Kindeni. Mine kala itu nzâmbe panzi i natu Yakopu ku Iso rua, nana vetâŋa ndia ma muli ipâŋga panzi rua kâ.

²¹ Aku Yakopu i kala kalo tawana Maro Kindeni. Mine kala imo lee zo laiti nana imâte kâ, ninenŋa itu nzâmbe panzi i natu Yosepe natu tamâne rua. I imarerea ne tukâla nana yokâŋa kâ tini, aku ipanea Maro Kindeni.

²² Aku Yakopu natu Yosepe, i kala kalo tawana Maro Kindeni. Mine kala imo lee ne zo laiti nana imâte kâ, ninenŋa itula nŋua pwataki nana zo muli ninde Isrel nŋu ma sipile Isip tâno ku siyâti silâ. Aku iporo nŋua tukuŋa panzi tu lâ zo ndia kinzi ma sipile Isip tâno, ande kinzi ma sikai i tuka iyoka kunzi silâ, ninenŋa ma sikea lâ tâno tonŋe.

Mose ne kalo-tawana ikeno pa Maro Kindeni

²³ Aku kinda timbunda Mose tina-tama, kinzi rua kala kalonzi tawana Maro Kindeni. Mine kala lâ zo ninde Mose tina ipagugua ipâŋga lâ, ande tina-tama rua sivea i ikura nzimona nato lâ. Kinzi rua simora i tu lâlu ara ndo, aku nandai siruru nana sitoto Isip nŋu nenzi koipu nŋalae ne nŋua. *

²⁴ Aku Mose, i kala kalo tawana Maro Kindeni. Mine kala lâ zo ninde itumbu ipâŋga nŋalae lâ, ande i tini pwâka tu kinzi ma sipatu i nana tu, "Isip nenzi Koipu Nŋalae timbu".

* **11:23** 23 Isip nenzi koipu nŋalae ne tukuŋa kaika ikeno mine; ambo Isrel nŋu taine tonŋe ma ipagugua natu ipâŋga, ambo tu tamâne, ande ma sipu pâta imâte.

²⁵ I ilo patea tu ambo i ma ikale malia kunzi Maro Kindeni ne ŋgu, ande ŋinde ma ara. Isama tu kiesaka ne ndekâŋa uru ikeno ikura zo mbwana-mbwana nâ, aku i tini pwâka tu ipono muli pa kiesaka ne vetâŋa kâ.

²⁶ I kalo tawana tu Maro Kindeni ma muli isupwa Kirisi imâ, aku i kalo ŋgere tona ŋana kulu ara ŋinde Maro Kindeni ma muli ilua i tamwata. Mine kala i ilo patea tu ambo i ma ikai maŋeti ŋana i ne kalo-tawana ŋinde kâ, ande ŋinde ma ara ndo, ipole mbaliŋa wa singâra arara rârâni ikeno lâ Isip tâno ŋinde.

²⁷ Mose i kalo tawana Maro Kindeni. Mine kala lâ zo ŋinde ipile Isip tâno ku ilâ, ande iruru ŋana Isip nenzi koipu ŋalae ne wisi-nâna kâ, ande tia. Ŋinde itogo Mose mata imora Maro Kindeni, inani uru imo paveâŋa nâ ŋana kindi tamâta. Mine kala ipono muli sondo pa nzâla ŋinde Maro Kindeni ipatea papa.

²⁸ Mose i kalo tawana Maro Kindeni. Mine kala ipaŋo Isrel ŋgu nenzi ilo-kalo ŋana ma sika kâŋa-nuŋa, ŋineŋga ma sivala “lama” seenzi lâ nenzi luma taitu-taitu ne nzâla tini. Isama tu ambo ma siveta mine, ande aŋelo ŋana ipunzi lâlu tamâne nzâla-kulu kâ ma iŋgenge ŋananzi Isrel nenzi lâlu tamâne nzâla-kulu.

Kinzi Isrel ŋgu timbunzi rârâ nenzi kalo-tawana kala ikeno kaika mine nâ

²⁹ Pa zo ŋinde, kinzi Isrel ŋgu tamâta kala kalonzi tawana Maro Kindeni. Mine kala kinzi soka mâsa-mâsa simbwaliu Tâi Njiji silâ. Taitu lâ zo ŋana Isip nenzi zugu tamâta sitogo tu soka Isrel ŋgu mulinzi simâ, ande tâi ipatukunzi

rârâni simbwatuke kala sipamateteu marumbu lâ.

³⁰ Kinzi Isrel tamâta kalonzi tawana Maro Kindeni. Mine kala zo tonje kinzi soka silâ sinje Jeriko lawea ne ngumbi ñalae ikura kari lima kanaño rua lâ. Ninennga ngumbi ñinde nde iyauru bururu ndue.

³¹ Aku Rahap, ina muŋga imo nzâla taine, ande i kala kalo tawana Maro Kindeni. Mine kala isukanzi Isrel tamâta rua ñinde muŋga soka paveâña nâ simâ ñana simora taine ne lawea ñinde kê. I ne vetâña ñinde nde ara nâ. Mine nde muli, lâ zo ñinde Isrel sipunzi tamâta ñinde muŋga sipu mulinzi pa Maro Kindeni, ande kinzi ñandai sipu Rahap nga.

³² Kala ñine naña ma atula ñgua ñalae ñana timbunda nenzi kalo-tawana kê, ande ma tia. Ambo naña ma atapâri tapârîña luandondo ñananzi Gideon wa Barak wa Samson wa Jepta wa Daviti wa Samyuel wa kinzi ñgua-tulâña tamâta wa, ande ñinde ma ipole zo.

³³ Tamâta ñinde rârâni nde kalonzi tawana Maro Kindeni. Mine kala kinzi pinde sipara kaika kunzi koipu ñalanala nenzi zugu tamâta lee sipolenzi lâ, ñinennga sikai poe sondo panzi ñgu ñinde. Kinzi siveta ikura Maro Kindeni muŋga ipatea panzi mine. Mine kala iveta kie ara nâ panzi, ikura muŋga ipa ñgua tu ma iveta mine. Annga timbunda pinde nde sipono mbwâmbwa saka “leve” kawanzi, kala mbwâmbwa ñinde sikura tu sikanzi, ande tia.

³⁴ Kinda timbunda pinde nde sipupu yââ mela-mela ñalae tina imâte lâ. Annga pinde

nde sikâwa pwapwataki silâ, kala zugu tamâta sikura tu sipunzi pâta simâte kê, ande tia. Kinzi pinde nenzi walo kaika tia, andeta muli nga sikai walo kaika lâ tininzi ku sipânnga tamâta kaika ndo lâ paraŋa ilo. Kinzi tamâta ŋinde siŋaranzi lawea pinde nenzi zugu tamâta sikâwa pwapwataki silâ.

³⁵ Kinzi taine pinde natunzi simâte lâ, ŋinenŋa Maro Kindeni ipaŋonzi simandi simo vianzi kilo, ku sitaulo silâ panzi tinanzi kilo. Anŋa timbunda pinde simâte lâ luma sakamao ilo. Kinzi zugu tamâta sizavarunzi tamâta ŋinde ndo lâ, aku sipainzi tu, “Ambo miki ma kapu mulimi pa Maro Kindeni, ande ma kayautemi piti kayâti kalâ”. Andeta kinzi ŋandai sipu mulinzi pa Maro Kindeni nga. Kinzi ilonzi patea tu ambo ma simâte, ande kinzi ma muli simandi simo vianzi kilo, aku ma sikai nenzi via ara ndo lâ samba lawea.

³⁶ Kinda timbunda pinde sikai nâna mine; nenzi kazâŋa tamâta siporo ŋgua pavaligiŋa panzi wa sipalilinzi wa. Anŋa pinde nde sikai nâna mine; nenzi kazâŋa tamâta sipa wâlo kaika lâ tininzi ku sionzi lâ luma sakamao ilo.

³⁷ Kinzi kazâŋa tamâta sisianzi timbunda pinde lâ mira simâte, aku sivenzi pinde kambwanenzi utu mo rua. Aku sikai pila ŋana kazâŋa kê ku sisowenzi pinde simâte. Anŋa kinda timbunda pinde nde sikai nâna mine; nenzi pasawaŋa ara tonŋe tia, kala sikai lama wa meme karaenzi silelea lâ kambwanenzi itogo lalava mwasina, ŋinenŋa soka tava maŋeti nâ silâ. Kinzi simo sugorai ndo, aku nenzi kazâŋa

tamâta siveta kenzi sakamao ndo panzi nana nenzi kalo-tawana kâ.

³⁸ Kinzi ninde uru soka potomule silâ wa simâ wa, sitogonzi tamâta nenzi tâno tonje tia. Kinzi sipavea warakanzi lâ nia bilimu wa nia tuu wa, aku sikeno lâ ngânza ilo wa wewe ilo wa. Miki kalonjo nga; kinda timbunda ninde rârâni nenzi kalo-tawana ikeno sonde ndo pa Maro Kindeni. Mine kala kinzi nde tamâta ara ndo, sipolenzi tâno tamâta rârâni.

³⁹ Kinda timbunda ninde rârâni kalonzi tawana Maro Kindeni, aku i ilo ara ndo panzi. Taitu lâ zo ninde kinzi simo vianzi lâ tâno kulu, ande kinzi nandai simora vetânga ara ninde Maro Kindeni munja ipa ngua tu ma iveta panzi.

⁴⁰ Nana tu munjani Maro Kindeni ilo pateu tu i ma muli iveta vetânga ara ndo tonje pa kinzi wa kindu wa. I ilo tu lâ zo ndia kinzi tamâta munjânga ninde nenzi via ma ipânga ara ndo, ande kindu nenda via kala ma ipânga ara lâ zoni ndaina.

12

Ara nana kindu ma taleu ndindi nâ ilâ pa Yesu

¹ Kindu timbunda ninde nenzi kalo-tawana nde kaika ndo, aku lâ zo nîne kinzini simandi ku sinje kindu mbwaliu lâ, itogo take-take njalae tina mwasina. Ninde itogo kindu tamandi nana tapalilu tapopole, aku kinzi simandi nana simora nenda palilunja kâ. Mine nde ara nana kindu ma tatambira kekeke malia ndia rârâni uru itawa kindu ndue, aku tapile kiesaka ninde uru ilita kindu kaika tona. Aku ara nana kindu ma

ilonda kaika ku naonda sondo tapalilu talâ pa keru ñinde Maro Kindeni muᅅga ipatea pa kinda.

² Kinda ma talea ilâ wa imâ wa pa nzâla ᅅgaᅅe-ᅅgaᅅe, ande tia. Ara ᅅana kinda ma talea ndindi nâ ilâ pa Yesu simbo nâ, ᅅana tu ina muᅅga ikai nzâla piti lâ ilonda kalonda ᅅana ma kalonda tawana i. Aku i uru isuka nenda kalo-tawana ᅅinde tu ipâᅅga kaika tona. Muᅅga, lâ zo ᅅinde Yesu imo tâno kulu, ande isama mine tu ambo i ma ipono muli sondo nâ pa vetâᅅa ndia Maro Kindeni ipatea papa, ande muli i ma imo ara ndo tava ndekâᅅa ᅅalae. I ilo pateo mine, aku ᅅana duvi ᅅinde kâ imandi kaika ku ikai nâna lee ᅅineᅅga imâte lâ kâi popole tini. Taitu i ᅅandai ilo malia ᅅana ikai mateᅅa kie mine ne maᅅeti ᅅga. Kala zo ᅅine isaᅅona Maro Kindeni tamwata tini pa wia kâ.

Maro Kindeni uru itu kinda sondo

³ Miki kalomi ᅅgere sondo ᅅga. Muᅅga kinzi kiesaka tamwatanzi wisinzi nâna ndo pa Yesu ku sikai kazâᅅa ᅅalae tina papa, andeta imandi kaika ndo. Ambo miki ma kalomi ᅅgere ᅅana i ne vetâᅅa ᅅinde kâ, ande ᅅinde ma ipu tini kaika pami, aku miki ma kamariri ku kapile nemi kalo-tawana, ande tia ndo.

⁴ Mao nâ, kinzi kiesaka tamwatanzi uru sikai kazâᅅa ᅅalae tina pami ᅅana nemi kalo-tawana kâ, kala miki kamo paraᅅa ilo; andeta miki seemi ᅅandai ipâᅅga lâ ᅅga.

⁵ Tiambo miki kalomi kapa ᅅana ᅅgua ᅅinde muᅅga Maro Kindeni iporo pami ᅅana ipu tini kaika pami, a? Miki nde kamo i nату wukale; mine kala iporo tu,

“ ‘Nana natungu, ambo Maro Nalae iveta vetâḡa tonḡe pano ḡana itu noko sonḡo kâ, ande ara ḡana noko ma kalo ḡgere sonḡo ḡana vetâḡa ḡinde ne duvi kâ. Ambo imbitano wa ileleano wa, ande noko ma ilo malia koḡa ḡana ḡinde kâ ndimo.

⁶ Nana tu ambo Maro Nalae tini mwasa pa tamâta tonḡe, ande i ma itu tamâta ḡinde sonḡo. Mao nâ, tamâta ea kinzi ipateanzi tu ma simo i natu wukale, ande i nâna ilanzi tamâta ḡinde râranî ḡana itunzi sonḡo kâ.”

⁷ Ambo Tamânda Maro Kindeni ma iveta kie mine pa miki, aku ḡinde iveta malia pami, ande miki ma kamandi kaika, ḡana tu iveta kie taituni pa miki itogo tamâta iveta pa natu mine. Tiambo tamâta tonḡe tini pwâka ḡana itu i natu sonḡo kâ, tiya? Tia ndo.

⁸ Miki kalomi ḡgere sonḡo ḡga. Maro Kindeni uru itunzi i natu wukale râranî sonḡo. Ambo i ma iveta mine tia pa tamâta tonḡe, ande ḡinde itula pwataki tu tamâta ḡinde imo itogo nzâla tamâta natunzi mine, aku i ḡandai Maro Kindeni natu mao ḡga.

⁹ Miki kalomi ḡgere sonḡo ḡana kinda tamânda kinzi lâ tâno ḡine kulu, kinzi ḡinde uru situ kinda sonḡo. Kinda tamege ḡananzi tamâta ḡinde, aku uru tasuka ḡanzi kâki tona. Mine nde ara ḡana kinda ma tamege ndo ḡana Tamânda Maro Kindeni kâ, ina imo samba ilo, ku tapatawa warakânda tininda lâ i nao. Ambo kinda ma taveta mine, ande kinda ma tamo viânda nâ.

¹⁰ Kinda tamânda kinzi lâ tâno ḡine kulu munḡa situ nenda mâsi wa vetâḡa sonḡo ikura

zo mbwana-mbwana nâ, ikura warakanzi nâ nenzi ilo-kalo mine. Anğa Maro Kindeni uru itu kinda sondo ɲana ivila kinda mao nâ, ɲana ma tapâŋga sondo ndo, itogo i imo mine.

¹¹ Lâ zo ndia tamâta tonje nâna ilua natu ɲana itu i sondo kê, ande natu ɲinde ɲandai indeka ɲana ɲinde kê. Nâna ɲinde iveta i ilo malia nâ. Andeta muli, ambo kinda ma tapanâna sondo ɲana nâna ɲinde kinda takai ɲana nenda vetâŋa soki kê, ande kinda ma takai kulu ara ndo. Kulu ɲinde nde mine; kinda ma tamo tamâta sondo ndo lâ Maro Kindeni nao, aku ma tamo tava wisinda pisi nâ.

Kinda ma tapakatona sondo nâ

¹² Mine kala miki kaloŋo ɲga; ambo noko mbau tonje mareŋa ku imo itâtâra nâ, ande ara ɲana noko ma kusuka mbau ɲinde kêki ɲana iveta vetâŋa ara kilo kê. Ambo noko kie tonje itogo imâte lâ ikeno nâ, ande ara ɲana noko ma pwisi kaika,

¹³ aku pwoka lâ vetâŋa ara ne nzâla nâ. Ambo tamâta tonje ne kalo-tawana ikeno kaika tia, ande ɲinde itogo induke ku iyoka sakamao. Ambo miki ma kamandi kaika tia, ande tamâta ɲinde ma ipayaula ndo. Andeta kaloŋo ɲga; ambo miki ma kamandi kaika, ande tamâta ɲinde ne kalo-tawana ma ipâŋga sondo kilo.

¹⁴ Miki ma kamakâsa ɲana kamo tava ilomi kalomi pisi nâ kunzi tamâta rârâni, aku kamakâsa ɲana kamo tamâta sondo lâ Maro Kindeni nao tona, ɲana tu kinzi tamâta sondo simbonzi nâ ma sikura tu simo kuku Maro Ɲalae.

15 Miki kapakatona sondo nga. Tia ma nawalami tonje ipu muli pa Maro Kindeni, ina wisi-wisi warika. Ambo nawalami tonje imo nginimi tava ilo makisa, ande njinde ma ara tia ndo, njana tu tamâta njinde ne ilo-kalo soki njinde ma inzarere ilâ ku ma iveta miki rârâ kapânga ilomi muso ndo lâ Maro Kindeni nao.

16 Ambo miki nawalami tonje ma ipalulua tini potomule, ande njinde ma ara tia ndo. Aku mine nâ, ambo imege njana Maro Kindeni tia, ande njinde ma ara tia ndo. Munja, kinda timbunda Isaka natu Iso njandai imege njana Maro Kindeni nga. Iso nde Isaka natu nzâla-kulu kê, kala tama ne kelekele rârâni nde i ne tona. Andeta zo tonje putole ipu, kala ipile njinde njana ika kondo taitu nâ.

17 Miki kasama tu muli, Iso ilo tu i tama Isaka ma itu nzâmbe papa i njana ikai kelekele arara njinde kê. Andeta Isaka iveta mine tia. Iso ita pâta njana ikai kelekele njinde kê, andeta nzâla tonje ikeno njana ikai nzâmbe kê, ande tia.

Kinda tamâ tapânga Jerusalem lawea tini laiti, lawea njinde ikeno samba ilo

18 Nia ndoyo, kinzi Isrel ngu silâ simo Sinai Tuu tini laiti. Njinde nde tâno ne tuu tonje, ikura njana kinzi simora ku sitaŋo lâ mbalaunzi. Lâ zo njinde, kinzi simora yââ njalae tina ikeno tuu njinde tini tava kondoma njalae ndo. Anja lawea iyoka kaika lâ.

19 Aku siloŋo tando ita, ku siloŋo kawa ngua tonje ne sarawâŋa imâ panzi tona. Kinzi siloŋo ngua njinde lâ, aku siruru pâta. Mine kala sipai

Mose tu, “Maka tinima pwâka tu kalonjo ngua kaŋa mine kilo.”

²⁰ Kinzi siruru ndo ŋana ngua ŋinde Maro Kindeni iporo panzi. I nde iporo mine tu, “Ambo tamâta tonje tâku simbi tonje ma imâ laiti ku itaŋo tuu ŋine tini, ande miki ma mira nâ kasia i pâta imâte.”

²¹ Kinzi simora mâsi ŋinde, aku siruru pâta kanaŋo. Aku Mose kala iruru mine nâ ku iporo tu, “Naŋa tiningu ruru ŋalae tina”.

²² Anja miki ŋandai kamâ kapâŋga tuu mine tini laiti ŋa. Miki nde kamâ kapâŋga Saion Tuu tini laiti, aku kapâŋga Maro Kindeni Via Tamwata ne lawea Jerusalem ikeno samba ilo. Kinzi aŋelo kambwanjenzi ŋalae ndo nde sipasau lâ simo lawea ŋinde tava ndekâŋa nâ.

²³ Aku miki kamâ kapâŋga pa Maro Kindeni ne tamâta nenzi pasauŋa. Kinzi nde simo sitogo i natu nzâla-kulu kâ mwasina, aku Maro Kindeni ingere tamâta ŋinde ŋanzi lâ pepa ikeno samba lawea ŋinde tini marumbu lâ. Miki kamâ kapâŋga Maro Kindeni tini laiti lâ, inani ma muli ipare nia panzi tamâta rârâni ŋana nenzi vetâŋa kâ. Aku miki kamâ kapâŋga pa kinzi tamâta pinde, kinzi ŋinde muŋga siveta vetâŋa ara lâ tâno kulu, ŋinenŋa simâte, kala ŋine sipâŋga tamâta ara ndo lâ Maro Kindeni nao.

²⁴ Miki kamâ kapâŋga pa Yesu lâ, inani ikai nzâla piti pa Maro Kindeni tu ma iveta ngua pâŋa wasaseki kunzi tamâta. Aku miki kamâ kapâŋga pa see ŋinde Yesu muŋga ipaliŋi ŋana ivila kinda kâ, aku i see ŋinde ipole see ŋinde

timbunda Abel nanayoni ipaliŋi lâ. *

Kinda ma tapu mulinda pa Maro Njalae kawa ŋgua ndimo

²⁵ Miki kapakatona sondu ŋga; miki ma kapu mulimi pa Maro Njalae kawa ŋgua ndimo. Nia ndoyo, Mose itula Maro Kindeni kawa ŋgua panzi Isrel ŋgu, andeta sipono taŋanzi ŋana ŋgua ŋinde kâ. Mose nde tamâta nâ, andeta muli ŋga kinzi tamâta ŋinde sikura tu sikâwa pa nia ŋgaŋe ku sipavea ŋana nenzi kiesaka ŋinde ne pareŋa-nia kâ, ande tia. Mine kala miki kalomi ŋgere sondu ŋga. Zo ŋine Maro Njalae tamwata itu ŋgua kaika pa kinda, aku i imo samba ilo. Ambo kinda ma tapu mulinda papa i, ande kinda ma takura tu takâwa ŋana nenda kiesaka ŋinde ne pareŋa-nia mâsi mana, a? Kinda ma takura tia ndo.

²⁶ Lâ zo muŋgâŋa ŋinde, Maro Kindeni kawa ŋgua iririŋo tâno marumbuni lâ. Taitu kala ŋine i ipa ŋgua mine tu, “Zo tonŋe kilo naŋa ma aveta tâno ririŋo ŋalae tina. Andeta tâno nâ ma ririŋo tia; naŋa ma aririŋo samba tona.”

²⁷ Maro Kindeni iporo ŋana “zo tonŋe kilo”, aku ŋgua ŋinde itula pwataki tu lâ zo muli ŋinde, ande i ma izavarunzi kelekele rârâni muŋga ipulianzi ŋinde, aku ma naonzi tia lâ. Aŋga kelekele ndia ipatea tu ma izavaru tia, ande kelekele ŋinde nâ ma simo.

²⁸ Lâ zo muli, kinda ma takai koipu kuku Kirisi mine ku tamo nâ, aku sâ tonŋe ma ikura tu

* **12:24** 24 Yesu see itula Maro Kindeni ne tini-mwasa kilala pwataki, aŋga Abel see itula tamâta nenzi wisi-nâna kilala pwataki.

iririŋo ŋinde, ande tia. Mine nde ara ŋana ma kawânda ndanŋe pa Maro Kindeni ku tapanea i sondo, itogo i tamwata ipatea tu ma taveta mine. Ara ŋana kinda ma tasuka i ŋa kâki ku tamege ŋana i kâ.

²⁹ Ŋana tu ŋgua ŋine nde mao kanaanjo: “Kinda nenda Maro Kindeni nde itogo yâa kaika ŋalae tina ŋana izavaru kelekele kâ”.

13

Kinda taitu-taitu ma tininda mwasa nâ panzi kalo-tawana tamâta

¹ Ara ŋana miki taitu-taitu ma tinimi mwasa ndo panzi nawalami kalo-tawana tamâta, ikura miki uru kaveta mine.

² Aku lâ zo ndia tamâta lombo ma simâ pa nemi lawea, ande miki ma kalomi ŋgere sondo ku kakainzi simo nemi luma ilo. Miki kasama tu muŋga, tamâta pinde sikainzi tamâta lombo pinde ku sionzi simo nenzi luma ilo ŋana sikatonanzi kâ. Kinzi situ tamâta lombo ŋinde nde tamâta nâ, andeta kinzi ŋandai tamâta ŋga; kinzi nde aŋelo.

³ Miki ma kalomi sukâŋa ŋananzi nimi-nambwe kalo-tawana tamâta ŋinde simo luma sakamao ilo. Miki ma kalomi sukâŋa lâ vetâŋa kie taituni itogo miki warakami kamo luma sakamao ŋinde ilo kunzi. Nenda kazâŋa tamâta uru siveta kenzi sakamao panzi nawalânda pinde, ande miki ma kalomi sukâŋa ŋananzi lâ vetâŋa kie taituni itogo kinzi siveta kenzi sakamao pa miki warakami mine.

⁴ Kinda tamâta nenda pakâeŋa nde vetâŋa ara ndo. Mine nde miki tamâta ea kakâe lâ, ande miki ma kakatona nemi pakâeŋa ŋinde sondo ndo, ŋana ŋinde ma ikeno mbâra-mbâra ndo lâ Maro Kindeni nao. Miki kasama tu Maro Kindeni ma ipare nia panzi tamâta ea siveta mâsi sakamao kaŋa-kaŋa ŋana sipalulua tininzi potomule kê.

⁵ Miki ma ilomi ŋalae koŋa ŋana kagona mbaliŋa kê ndimo. Ara ŋana miki ma kaporo lâ warakami ilomi tu, “Kelekele ndia kala naŋa akai lâ, ande ŋinde ikurana”. Ŋana tu Maro Kindeni muŋga iporo ŋgua mine tu,

“ ‘Naŋa ma akatonami ikura zo rârâni. Naŋa ma apilemi kamo kaa nâ, ande tia ndo’.”

⁶ Mine kala kinda takura tu tamandi kaika ku taporo mine tu,

“ ‘Maro Ŋalae nde nanenŋu Pavilâŋa Tamwata. Mine kala naŋa ma aruru tia ndo, ŋana tu kinzi tamâta sikura ŋana siveta vetâŋa soki pa naŋa, ande tia.’”

Kinda ma mainda ŋana nenda kalo-tawana kê ndimo

⁷ Ara ŋana miki kalo-tawana tamâta ma kalomi ŋgere ŋananzi tamâta ŋinde muŋga sikai poe pami. Kinzi tamâta ŋinde muŋga situla Maro Kindeni kawa ŋgua pami. Ara ŋana miki ma kalomi ŋgere sondo ŋana vetâŋa rârâni siveta ŋinde, lâ zo ŋinde kinzi simo vianzi yo. Aku ara ŋana miki ma kao nemi kalo-tawana ilâ sondo pa Maro Kindeni, ikura nenzi kalo-tawana mine.

⁸ Yesu Kirisi i nana ipalele kâ, ande tia ndo. Vetâna ndia iveta lâ zo munğâna, ande i uru iveta vetâna kie taituni lâ zo nîne wa lâ zo muli-muli wa.

⁹ Mine nde miki ma kapaloŋo pa ngua kaŋa-kaŋa ndimo, nana tu ngua ninde ma izavaru ilomi kalomi ku iveta miki kalomi kapa nana Maro Kindeni ne nzâla kâ. Ara nana Maro Kindeni ne wisi-wisi simbo nâ ma ipu tini kaika pa ilonda kalonda. Anğa ngua tukuŋa kiri-kiri nana kâna-nuŋa kâ nde ikura tu ipu tini kaika mine pa kinda, ande tia. Ambo tamâta tonje ma ipaveta kuku ngua tukuŋa kie mine, ande ninde ikura tu ivila i, ande tia.

¹⁰ Kinda nenda patarawâna kie tonje imo, aku patarawâna ninde ikura tu ivilanzi patarawâna tamâta ninde uru siveta wurâta lâ Juda nenzi luma sapâna ilo, ande tia.

¹¹ Patarawâna tamâta nenzi tamâta nalaie uru iveta patarawâna tonje mbwani taitu nâ ikura mbwera mbwera. I uru ikai lama wa bulmakao seenzi ku ilâ pa luma sapâna ne “Nia Sapâna Ndo”, ninenğa iveta patarawâna nana izavaru kiesaka piti kâ. Anğa simbi ninde karae nde sikai siyâti simomo lâ yââ kulu lâ lawea nğane kana lâ.

¹² Nana duvi ninde kâ, ande Yesu kala imâte nia yo lâ lawea nalaie ne ngumbi nğane, nana i tamwata see ma izavaru kiesaka ne muso piti lâ tamâta ilonzi kalonzi.

¹³ Mine nde ara nana kinda ma tayâti talâ pa Yesu lâ lawea nğane, ku takai maŋeti itogo i munğa ikai mine.

¹⁴ Kinda tasama tu nenda lawea mao ɲandai ikeno tâno ɲine kulu ɲga. Taitu kinda uru tao tininda ɲana lawea tonje ma ipâŋga lâ zo muli kâ.

¹⁵ Mine nde ara ɲana kinda ma tasuka Maro Kindeni ɲa kâki ikura zo zo. Yesu iveta nzâla pa kinda ɲana ma tapanea Maro Kindeni, aku paneâɲa ɲinde ma ikâki papa i itogo nenda patarawâɲa mwasina.

¹⁶ Ambo miki nawalami pinde simo kaa nâ, nenzi kelekele tia, ande ara ɲana miki ma kaveta kemi ara panzi ku kavilanzi lâ nemi kelekele pinde. Miki ma kalomi kapa ɲana kaveta mine kâ ndimo, ɲana tu Maro Kindeni ilo ara ndo ɲana patarawâɲa kie mine.

Maro Kindeni i ɲana iveta kinda tamo ara kâ

¹⁷ Miki nemi poe tamâta kinzi nde uru sikatonami sondo ikura zo rârâni. Kinzi sisama mine tu muli ɲga, kinzi ma sipatula warakanzi pa Maro Kindeni ɲana wurâta rârâni muɲga siveta ɲinde. Mine nde ara ɲana miki ma kaponu muli sondo pa kawanzi ɲgua ku kamo kalonzi nâ. Ambo miki ma kaveta mine, ande kinzi ma ilonzi malia tia. Kinzi ma sindeka nâ ɲana siveta nenzi wurâta ɲinde. Ambo kinzi ma sikatona miki tava ilonzi malia, ande ɲinde ma ivilami tia.

¹⁸ Ara ɲana miki ma kano kaika pa Maro Kindeni tu ma isuka maka. Maka kapasama tu iloma kaloma ikeno mbâra-mbâra ndo lâ i nao, aku maka iloma tu kaveta vetâɲa ara nâ ikura zo rârâni.

¹⁹ Naŋa ilonŋu ndo tu miki ma kano pa Maro Kindeni tu ivila naŋa ku walele nâ io naŋa ataulo amâ pami kilo.

²⁰ Kala ŋine miki kakai Maro Kindeni ne nzâmbe mine; nenda Maro Ŋalae Yesu, ina kinda lama ŋgu nenda katonâŋa ara, ande ipaliŋi tamwata see ku imâte ŋana iveta Maro Kindeni ne ŋgua pâŋa wasaseki ipâŋga kanaŋo, aku ŋgua pâŋa ŋinde nde ŋana marumbu kê, ande tia ndo. Mine kala Maro Kindeni, ina wisi-pisi warika, ipaŋo i lâ materŋa nianzi imo via kilo.

²¹ Maro Kindeni ne pavilâŋa imâ pami ku ivilami ŋana kaveta vetâŋa rârâni ipatea pami ŋinde. Aku ina io Yesu Kiriŋi ne walo kaika imâ ilonda kalonda, ŋana tamo sondo lâ i nao, ikura i ilo papa mine. Kinda nenda paneâŋa ilâ pa Yesu Kiriŋi ikura zo zo, ma tasuka i ŋa kêki mine ku tamo nâ. Mao.

Wisi-ara ne ŋgua pinde

²² Niŋgu-nambwe wukale, naŋa ilonŋu tu miki ma katambira taŋami sondo ŋana ŋgua rârâni anŋere lâ pepa ŋine tini. Naŋa anŋere ŋgua ŋine ŋana ipu tini kaika pa ilomi kalomi, aku anŋere ŋgua ŋalae koŋa tia.

²³ Naŋa ilonŋu tu miki ma kasama ŋine; ninda-nambwe Timoti, ande sikai piti lâ luma sakamao ilo iyâti ilâ lâ. Ambo i ma imâ ipâŋga pa naŋa walele nâ, ande maka rua ma kamâ kamora miki.

²⁴ Maka kano pami tu kaporo kawama kari ara panzi nemi poe tamâta rârâni, aku ilâ panzi Maro Kindeni ne tamâta rârâni tona. Aku kinzi

kalo-tawana tamâta simo Itali tâno ñine kala
kawanzi kari ara pami tona.

²⁵ Maro Kindeni ne wisi-wisi imo ku miki
rârâni.

MARO KINDENI KAWA NGUA
The New Testament and Psalms in the Sio Language
of Papua New Guinea
Nupela Testamen long tokples Sio long Niugini

Copyright © 1995 Wycliffe Bible Translators

Language: Sio

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-09

PDF generated using Haiola and XeLaTeX on 18 Apr 2025 from source files dated 31 Aug 2023

b3b81168-89df-5bc3-8b0c-cf72ef93d3de